

'Dhεbhowunta 'sëedhε 'ö Zan -ya =bεεn 'ö =nε

¹ Pë 'ö =bεεn' -sü 'ka 'sëedhε -be 'ö =nε -a 'gü 'ö tɔɔ pë -nu 'wo dho kë -dhεkpaɔ =dhia' -bha 'ö -Zlan -ya -wun -lo Yesu Klito kwεε kö -yaan -a -zɔn ö -bha yuökεmε -nu -dhë. Klito -ya -zɔn 'ö bɔa ö -bha yuökεmε Zan 'gü, -Zlan -bha bɔmε -bɔ -a -dhë -sü 'ka. ² Pë -nu 'ö Zan -ya yö =nε 'ö- =blεε. 'Wun 'ö- =blεε' -na zö =nε 'ö tɔɔ 'wun -nu 'wo go -Zlan 'piö waa- 'wun gia- 'ö Yesu Klito -ya -zɔn. ³ =Zuögludhi -yö kë mε 'ö 'sëedhε -be 'ö =nε 'ö 'dhoë- -a pö -a -gɔ! =Zuögludhi -yö kë mε 'ö 'dhoë- ö 'to to -Zlan 'dhi -wo 'ö =nε -a -bha, kö pë -nu 'wo -ya =nε -yaan =bhlë -ya -a -gɔ! Bhii 'töng 'ö -ya -sü 'ka kö pë -nu 'wo =nε -waan kaa bhë =ya yö =klöö'.

=Wekadhe 'ö dho Yesu -wun -dhε 'wun gia- -mε -nu -dho 'kuë- -sü 'slaplε 'piö

⁴⁻⁵ Ma Zan =nε 'ö 'sëedhε =nε 'a- bɔ Yesu -wun -dhε 'wun gia- -mε -nu -dho 'kuë- -sü 'slaplε 'ka Azi -sε 'gü ka -dhë: 'Ka =büee. -Zlan 'ö -kë -dhö, 'ö =tun -dhö, 'ö dhö nu 'dhö, -zuu 'slaplε 'wo- -bha 'gɔ -gbloo 'dhiö 'dhö, waa- Yesu Klito 'ö kwa =goo- -towogüsüzë 'ka, Gbö -blεεzë, 'yö mε -blεεzë 'yö go ga 'gü -a 'ka, 'yö mε =va 'ka -gludë -nu 'wo 'kpongtaa zö -an -ta, -wo 'glusë waa- =zuöyagluu 'ö go -an 'piö -an kë ka 'ka. Yesu Klito =nε 'ö kwa -dho -ya -kë, 'yö kwa dha kwa -bha =sɔɔn yaa -nu -gɔ, -ga kwa -wun 'gü -sü 'ka. ⁶ 'Ö 'kwa -kë ö -bha -gludëdhε -pö 'gü -mε -nu, slabhome -nu 'ö 'kwa dho yuö kë -a Dë -Zlan -dhë -an 'ka. 'Tɔbhɔdhe waa- 'piigbeedhε -wo kë Yesu Klito -bha 'ka =toëpö 'ka! (Amεn!)

⁷ -Ka -dhe -ga, -yö nu -na dha kpö -nu -ta; mE -nu 'saadhö 'yan -dhö -da -a 'gü; mE -nu gia- 'wo- zɔa 'dü 'ka bhë -an 'yan -dhö dɔ -a -bha 'pö. 'Sɛgüme -nu 'saadhö -wo -dho 'gbo -nu bɔ wo -de =maa' -sü 'ka -a -wun 'gü. Pë 'ö -de dho kë yö -mü. Amɛn.

⁸ Kwa DëmE -Zlan 'piigbeežë, 'ö -kë -dhö, 'ö =tun -dhö, 'ö dho nu bhë =nE 'ö 'wun =blɛɛ 'ö- pö: «Ma =nE 'a 'wun 'plɛ züdɔdhe waa- -a 'dhiötodhe 'ka.»

Zan -bha 'yanpiöpë 'ö -gban Klito -bha -a -sü

⁹ N tɔɔ Zan; a ka dheglu 'ka, 'ö 'kwa Yesu 'gü do; ma =nE 'ö 'klobhɔdhe 'ö -gban -Zlan -bha -gludëdhe -wun -bha, 'a ka 'piö do -a wo -sü 'gü, -dɔ -a -gɔ -sü 'ka =zuösaadhɛ 'gü bhë. 'Yiziëndhe 'wo- -dhe Patemɔsö 'a -ya -a -bha =nE, -Zlan -wo waa- 'wun gia- 'ö -kë =bɛɛn' -sü 'ka 'ö Yesu -ya yö -dhegbɛadhɛ 'gü bhë -an =blɛɛ' -'a- wo bhë =nE 'ö 'wo n kun -a -wun 'gü 'wo nu n 'ka zö =nE. ¹⁰ DëmE -bha yi 'ka a -kë mü 'ö -Zuu 'slööslö -yö pa n 'ka, 'ö 'a -wo do ma n =zlöö =zian'. 'Ö -wo bhë 'ö -kë 'gbee- 'ka =nE =dhe 'wo 'truu -piö -a -bha 'kpa -a 'dhö. ¹¹ -Wo bhë -ya pö: «Pë -nu 'ü 'dhoë- yö =nE -a =bɛɛn' 'sëedhe -be do 'gü, kö 'sëedhe -be bhë 'ü- bɔ Yesu -wun -dhe 'wun gia- -mE -nu -dho 'kuë- -sü 'ö Efɛzö, 'ö Simiinë, 'ö Pɛɛgamë, 'ö Tiatii, 'ö Saadö, 'ö Filadɛɛfi waa- -a mE 'ö Laodise -an -dhë. -An -dho 'kuë- -sü -yö 'slapɛ.»

¹² 'A =dhië n -zü, 'a -dhe -ga n =zlöö kö mE 'ö 'wun =blɛɛ' -na n -dhë bhë 'aan- yö. 'Ö 'a =labang -dɔatapë 'slapɛ 'ö 'sënnɔ 'ka -a yö. ¹³ Kö pë do 'ö bhɔ mE 'bhee- -bha -yö dɔ -sü 'ka -an ziën. Gblang do =gbiin 'ö nu 'ö yö -a -gɛn kpöödhö -yö -kë -a -bha; 'sënnɔ -du kwi -yö ziö -sü 'ka -a -kënnɔ 'gü. ¹⁴ -A -bha wun -nu -wo kë 'puu =nE 'bhla kaa- 'puu 'dhö =nE 'yɔɔ 'dhö, 'ö- 'yan -nu -wo bhü =nE 'siö 'dhö. ¹⁵ -A -gɛn -nu -wo -bhü =nE zën 'wo- bho 'ö 'wo- -kë

'drëendrën -a 'dhö; 'ö- 'we -wo -zuö -kë =va -kɔ -yö -kë =nɛ 'yi -zuö -drinng 'dhö. ¹⁶'Susongga 'slaplɛ -wo -kë -a =kwɛɛ- 'gü -kɔ 'gü 'ö -dhaa 'dhiözë 'ö- 'dhiö 'dho zian =plɛ 'ka 'ö go -a dhiö. -A wöödhɛ -yö -bhü =nɛ -kɔ 'ö lan- 'dho 'bhü -na -a 'ka, kö =ya dɔ 'dhëë ziën bhë -a 'dhö. ¹⁷=Dhɛ 'ö n 'yan -yö -da -a 'gü, 'a -püö -a =gɛɛndhö =nɛ mɛ =ya ga -a 'dhö. 'Yö ö =kwɛɛ- 'gü -kɔ sü 'yö- -da n gban -ta -a pö -sü 'ka =nɛɛ: «Kö =kun 'ö 'suö -yö ü -kë! Ma 'a tɔɔ mɛ -blɛɛzë; ma 'a tɔɔ mɛ -kaanta. ¹⁸Ma 'a tɔɔ mɛ 'ö 'bhee-; a -ga, 'kɛɛ =dɛɛ =nɛ -a 'gü bhë, a 'bhee- =toëpö 'ka zlöö. -Kɔ -mɔ 'wuën- -sü -yö n -gɔ ga waa- =glööbɔɔdhɛ -an -ta. ¹⁹Pë -nu 'wo kë -na =nɛ waa- pë -nu 'wo dho kë -an 'piö 'ü -an yö -na =nɛ, -bhö -a -ya 'sëedhɛ 'gü! ²⁰-Dhɛ -ga 'zü, 'susongga 'slaplɛ 'ü- -ga -na n =kwɛɛ- 'gü =zian' =nɛ waa- 'sënnng =labang -dɔatapë 'slaplɛ -wun =nɛ -an -gɛn 'ö -bin -sü 'ka 'wo =nɛ: 'Susongga 'slaplɛ 'ö 'wo =nɛ 'wo tɔɔ -Zlan -bha yuökëmɛ 'slaplɛ 'wo 'dhiö -sü Yesu -wun -dhɛ 'wun gia- -mɛ -nu -dho 'kuë- -sü kpö 'slaplɛ 'wo bhë -an 'ka -mɛ 'ka bhë -an -bha. 'Ö =labang -dɔatapë 'slaplɛ 'wo =nɛ 'wo Yesu -wun -dhɛ 'wun gia- -mɛ -nu -dho 'kuë- -sü kpö 'slaplɛ bhë -an 'ka.»

2

'Sëedhɛ 'ö dho Yesu -wun -dhɛ 'wun gia- -mɛ -nu -dho 'kuë- -sü 'ö Efɛzö -a 'piö

¹=Dhɛ 'ö pë -nu 'wo bhë =yaa- -gɛn -nu pö n -dhë 'dhö, 'yö- pö 'zü: «-Bhö 'sëedhɛ bɔ Yesu -wun -dhɛ 'wun gia- -mɛ -nu -dho 'kuë- -sü 'ö Efɛzö bhë -a -dhë 'ü- pö -a -dhë =nɛɛ: Mɛ 'ö 'susongga 'slaplɛ 'dhoë- =kwɛɛ- 'gü =zian', 'ö 'ta 'sü -sü 'gü =labang -dɔatapë 'slaplɛ 'wo 'sënnng 'ka -an ziën bhë -ya -pö: ²Pë -nu 'ü- kë -na 'tööüdhö bhë a- -dɔ. A =sëëbhodhe waa- =zuösaadhɛ 'wo ü 'gü bhë -a -yö. A =dɔa' =nɛ kaa- 'gluyaamɛ -nu ka këwun -nu 'waa do; mɛ

-nu 'wo wo -de -dhe -na Yesu -bha bɔmɛ -nu 'kɛɛ 'waa-
 'ka bhë, ü -an 'piö -ga, 'ö 'ü- yö =nɛ =suamɛ -mü -an 'ka.
³ =Zuö' kē -saa -sü -yö ü -gɔ; ü 'yënnɔ -yö -bhɔ n -wun 'gü
 'ö =faan' yaa 'go ü 'gü. ⁴ 'Kɛɛ pē 'ö n -zuē ü buëndhö 'ö =nɛ:
 N -dhɔ 'yaa ü -bha gbɔ =nɛ -kɔ 'ü- zü dɔa bhë -a 'dhö. ⁵ Ü
 -zo -yö -büö -dhɔ 'ö -kē ü 'gü 'dhiö =zian' n buëndhö 'ö
 'bha ü =kwaä' -a -zü bhë -a -wun 'ka! Dɔ 'ö 'kwa- wo =dɛɛ
 =nɛ, -bhö ü kē -kɔ -ga 'dhɛ! 'Go ü bha =sɔɔn yaa -nu 'gü,
 'ü -dhië' -Zlan 'piö, 'ü 'wun -nu kē =nɛ -kɔ 'ü- =kaa' 'dhiö
 -blɛɛzē 'ka bhë -a 'dhö. 'Ö =ya kē =nɛ ü 'ka 'go ü -bha =sɔɔn
 yaa -nu 'gü, a -dho nu ü -gɔ 'a ü bha =labang -dɔatapë bho
 piën-. ⁶ -Yö 'dhö, 'kɛɛ 'wun mɛ 'ö n -zo 'kun -wun 'ka ü
 buëndhö 'ö tɔɔ: Pē 'ö Nikolaitö -nu 'dho -a kē -na bhë ü-
 -san -zē =nɛ n 'dhö 'pö.

⁷ Kö mɛ 'ö- 'wun ma -to 'dhö -dhö, pē -Zuu 'slöösLö
 'dhoë- =blɛɛ' -na Yesu -wun -dhe 'wun gia- -mɛ -nu -dho
 'kuë- -sü -dhë =nɛ -ya ma.

Mɛ -nu 'wo 'dhoë- to -a 'gbee- 'ka, a -dho -këdhösü -lü
 bhɛ 'ö -Zlan -bha 'tɛɛpadhɛ -bha -a nu -an -dhë, 'wo-
 -bhö.»

'Sëedhe 'ö dho Yesu -wun -dhe 'wun gia- -mɛ -nu -dho
 'kuë- -sü 'ö Simiinë -a 'piö

⁸ 'Yö- pö: «-Bhö 'sëedhe bɔ 'dhiö -sü -Zlan -bha mɛ -nu
 'ka -mɛ 'ö Yesu -wun -dhe 'wun gia- -mɛ -nu -dho 'kuë-
 -sü 'ö Simiinë -a 'gü bhë -a -dhë =nɛɛ: Mɛ 'ö ga, 'ö =ya 'go
 ga 'gü 'ö 'wun 'plɛ züɔdhɛ waa- 'wun 'plɛ 'dhiötodhe
 'ka bhë, -ya -pö: ⁹ A ü -bha 'yënnɔgbhɔdhe -dɔ; 'a ü bha
 'fɛɛdhe -dɔ. A- -pö 'dhö 'kɛɛ giagia 'ka ü =bhɔɔzē! 'Wun
 'ö mɛ -nu 'wo wo -de -dhe Zuifö -nu 'ö 'waa Zuifö 'ka 'wo-
 =blɛɛ' -na ü -gɔ bhë a- -dɔ. Dü -bha mɛ -nu -mü. ¹⁰ Kö
 =kun 'ü -suö ü 'yënnɔ 'ö 'dhoë- bhɔ bhë -a -wun 'gü! Ü 'to
 'to: 'Ö tɔɔ ka -dho -da 'güandhe 'gü, dü -bha ka kpö 'gü
 -mɛ -nu 'bhaa -nu -da -kanso 'gü -sü 'ka; ka 'klo- -dho bhɔ

-dhekpaoyi 'gɔɔ- do 'piö. 'KEE -bhö 'to -klu -sü 'ka -Zlan -bha -yö 'dho -yö yöë ü -bha ga -yi -bha; a -dho ü gbaa kë -a 'gü -sü 'gɔ =gblaa' 'ö dho -a -zɔn =nɛ ü -to -a 'gbee- 'ka bhë -a 'ka.

¹¹ Kö mɛ 'ö- 'wun ma -to 'dhö -dhö, pë 'ö -Zuu 'slööslö 'dho -a =blɛɛ' -na Yesu -wun -dhɛ 'wun gia- -mɛ -nu -dho 'kuë- -sü -dhë =nɛ -ya ma. Mɛ -nu 'wo 'dhoë- to -a 'gbee- 'ka bhë, ga kë =plɛ -naa yaa 'dho nu -an -ta.»

'Sëedhɛ 'ö dho Yesu -wun -dhɛ 'wun gia- -mɛ -nu -dho 'kuë- -sü 'ö Pɛɛgamë -a 'piö

¹² 'Yö- pö 'zü: «-Bhö 'sëedhɛ bɔ 'dhiö -sü -Zlan -bha mɛ -nu 'ka -mɛ 'ö Yesu -wun -dhɛ 'wun gia- -mɛ -nu -dho 'kuë- -sü 'ö Pɛɛgamë -a 'gü bhë, -a -dhë =nɛɛ: Mɛ 'ö -dhaa 'dhiözë 'ö- 'dhiö 'dho zian =plɛ 'ka 'yö- kwɛɛ bhë -ya -pö: ¹³ A ü këdhɛ -dɔ; yö kun tɔɔ -dhɛ 'ö dü -bha 'gɔ -gbloo 'dhoë- -bha -a! 'KEE ü 'ka ü bo -zo -yö n -ma -sü 'ka; bhii ü -to -klu -sü 'ka n -ma -së 'ka, 'töng gia- -de 'ö n -goo- 'ö 'yaa 'kan n -ma 'wo- -dhɛ Antipasö bhë 'wo- zaa plöö, -dhɛ 'ö dü 'dhoë- -bha bhë -a -bha. ¹⁴ 'KEE -a -kë 'dhö -sü 'ka 'wun do -yö n -züë ka buëndhö: Mɛ -nu -wo ü =plöö 'ö 'wo -klu -sü 'ka Balaamö -bha mɛ =daan' -wo -bha. Bhii Balaamö -yö -gleng -nu -da Balakö =züö' 'piö kö -ya këdhɛ =mɛɛ' -yaan Izlaɛlö -mɛ -nu -da =sɔɔn yaa 'gü wü 'wo wo -bha gbapë -nu gba -na 'ka bhë -a -bhö -sü 'ka; 'go mü 'wo wo -de nu =sɔɔn kë -sü -dhë. ¹⁵ -Kɔ do bhë =nɛ 'ö mɛ 'bhaa -nu 'dhoë- 'ka ü =plöö 'ma 'ö 'wo 'to -sü 'ka Nikolaitö -nu 'wo -kë gbapë 'vlanvlan gbamɛ -nu 'ka bhë -an këpë -nu 'piö. ¹⁶ =Dhɛ 'ö 'pö, -bhö 'go ü bha =sɔɔn yaa -nu 'gü! 'Yaa 'pö a -dho nu ü -gɔ yi 'bhaa 'ka, 'a 'ko -zë mɛ -nu 'wo 'dhö bhë -an 'ka (n -wo 'ö -kë) -dhaa 'ö 'go -na n 'dhii -a 'ka bhë -a 'ka.

¹⁷ Mɛ 'ö- 'wun ma -to 'dhö -dhö, 'wun 'ö -Zuu 'slööslö 'dhoë- =blɛɛ' -na -Zlan -bha mɛ -nu -dhë bhë -ya ma!

Mε -nu 'wo 'dhoë- to -a 'gbee- 'ka, a -dho 'manë 'ö -bin -sü 'ka bhë -a nu -an -dhë, 'go mü 'a dho -guö kpö 'puu, 'ö mε 'ö -dhö 'ö- 'to 'dho -ya -sü 'ka -a -ta -a nu -a -dhë. 'Tɔ -dëü gβε 'ö mε gβε yaa- dɔ, -a 'ke yaa kë mε 'a- nu -a -dhë bhë -a 'ka 'ö dho kë -ya -sü 'ka -guö kpö bhë -a -ta yö -mü.»

'Sëédhε 'ö dho Yesu -wun -dhε 'wun gia- -mε -nu -dho 'kuë- -sü 'ö Tiatii -a 'piö

¹⁸ 'Yö- pö 'zü: «-Bhö 'sëédhε bɔ 'dhiö -sü -Zlan -bha mε -nu 'ka -mε 'ö Yesu -wun -dhε 'wun gia- -mε -nu -dho 'kuë- -sü 'ö Tiatii bhë -a 'piö =woë' =nεε: -Zlan Gbö 'ö- 'yan 'dho 'bhü -na =nε 'siö 'dhö, 'ö- gεn -nu 'dho 'bhü -na =nε zën 'wo- bho 'wo- -kë 'drëendrën -a 'dhö bhë -ya -pö: ¹⁹ A ü këyuö -nu -dɔ; ü -bha -Zlan waa- mε -nu -an -dhɔ kë -sü -nu, ü -bha -zo yö -sü -nu, ü -bha -to -klu -sü 'ka -Zlan -bha -sü -nu, ü -bha -kë -naazë -sü waa- ü -bha yuö -kaanta =plëezë 'ö -ziö -an -blεεzë -ta bhë a -an 'plε -dɔ. ²⁰ 'Kεε pë 'ö n -zuë ü büëndhö 'ö tɔɔ: Dhebo 'wo- -dhε Zezabelö 'ö- pö ö -de -dhë ö -Zlan -wodhiölodhe 'ka bhë -a 'to 'ü- wo ka ziën bhë yaa kë n -dhë -së. -Yö ma yuökëme -nu -daan =sɔɔn kë -sü 'ka. -Ya -pö -an -dhë 'zü wü 'wo gbapë -nu gba -na -a 'ka bhë, -wa -bhö. ²¹ A 'töng -nu -a -dhë kö -yaan 'kan =sɔɔn yaa kë -sü -bha, 'ö yaa 'pa ö -deë kö -yaan ö =kwaa'- ö -bha =sɔɔn kë -sü -zü bhë. ²² =Dhε 'ö 'dhö, a -dho -a kë 'ö yö 'dhö waa- mε -nu 'wo =sɔɔn bhë 'wo- 'gü 'wo dho sia- 'yua 'ka, -a 'ke waa wo bo wo wɔ -kɔ yaa -nu 'wo bhë -an 'ka. ²³ A -dho -a -bha 'në -nu zë, -yö kë 'dhö kö Yesu -wun -dhε 'wun gia- -mε -nu -dho 'kuë- -sü -nu 'saadhö -wa dɔa =nε a mε 'ö mε -nu -bha -zo -ta -a 'gü -wun waa- -an =dhɔɔbhaapë -nu dɔ -a 'ka. 'Kεε kë- wo 'dhö bhë -yö kë ka 'yaan =nε mε 'ö -dhö ka ziën, -kɔ 'ö 'dhoë- pë -nu kaa bhë =nε 'a dho -a =saan' bhoë.

²⁴ -Zlan -bha mE -nu, mE 'ka to Tiatii =ya kē ka -bha 'ka, kaa 'to -an -bha mE =daan' -wo 'ö bhē -a 'piö, 'ö pē 'ö mE -nu -wa -dhE Satan -bha -gleng -wun -nu 'piö =gbiinzē 'wo -bin -sü 'ka 'ö kaa- =daan' - bhē, a- -pö ka -dhē, n 'ka 'dho -wo -zuöatadhe 'waa gbE kē gbɔ. ²⁵ 'KEE pē mE -nu 'ö 'wo ka -gɔ ka -bha -zo yö -sü 'gü bhē, -kaa -an 'kun 'gbee- -yö 'dho -yö yöē n nu -yi -bha. ²⁶⁻²⁷ mE 'ö 'dhoē- to -a 'gbee- 'ka, 'go mü 'zü 'ö 'dhoē- ö -zo kē ma yuö kē -kɔ -nu 'wo =nE -an 'piö, a -dho -wogbiindhE nu -a -dhē 'sɛgɔgümE -nu -ta. -Yö -dho 'dhiö sü -an 'ka -piö 'gblɔŋgblɔn do 'ka; 'go mü 'yö dho -an =wüü'- =nE -kɔ 'wo gbɔ 'sE kpö =wüü'- -na -a 'ka bhē -a 'dhö =nE -kɔ 'ö -kɔ -mɔ 'wuën- -sü 'ö go n Dē 'piö 'ö- 'ka n -gɔ bhē -a 'dhö. ²⁸ A -dho -dhiadhiö 'susongga nu -a -dhē.

²⁹ Kö mE 'ö- 'wun ma -to 'dhö -dhö, 'wun 'ö -Zuu 'slöslö 'dhoē- =blE' -na Yesu -wun -dhE 'wun gia- -mE -nu -dho 'kuē- -sü -dhē bhē -ya ma.»

3

'SēēdhE 'ö dho Yesu -wun -dhE 'wun gia- -mE -nu -dho 'kuē- -sü 'ö Saadö -a 'piö

¹ 'Yö- pö n -dhē: «-Bhö 'sēēdhE bɔ 'dhiö -sü -Zlan -bha mE -nu 'ka -mE 'ö Yesu -wun -dhE 'wun gia- -mE -nu -dho 'kuē- -sü 'ö Saadö bhē -a -dhē =nE: Pē 'ö mE 'ö -Zlan -bha -Zuu 'slaple waa- 'susongga 'slaple 'dho -a -gɔ 'ö- =blE 'yö =nE: Pē -nu 'ü- kē -na 'saadhö bhē a- -dɔ. A- =dɔa' =nE mE -nu -wo ü ga =nE mE 'ö 'bhee- -a 'dhö, 'kEE kö ü ga -sü 'ka. ² -Bhö -büö, 'ü -dɔ gɛnngdhö -sü nu mE -nu 'wo =tun ü -gɔ, 'ö =wa kē 'tēētē bhē -an -dhē kö =kun 'wo dho ga. Bhii 'ma- yö =nE ü bha yuö -nu 'ü- kē -na bhē -a gbE 'yaa -yö 'ko 'dhiö -sü 'ka n ma -Zlan wö 'dhiö. ³ Ü -zo -yö -büö mE =daan' -wo 'ü- ma bhē -a -wun 'ka! 'Go mü ü -zo -yö -büö 'zü -an ma -kɔ 'ü -an maa bhē -a 'ka. -Bhö 'wun

ma mE =daan' -wo bhë -a -ta, 'ü 'kan ü bha -sɔɔn yaa -nu bhë -an -bha. -A 'ke ü 'ka -büö 'gbEEdhö, a -dho nu ü tii 'ka =nE =kwaanmE -yö nu. ⁴'KEE kë- wo 'dhö bhë, ü -bha mE 'bhaa -nu 'wo Saadö -dhe gia- -bha, waa wo -bha sɔ -nu kë -dhiizë. -Wo -dho kë n 'piö sɔ 'puu -kë wo -bha -sü 'ka. Bhii 'ö tɔɔ -yö -an -ma -kun kö -wo kë 'dhö. ⁵M E -nu 'wo 'dhoë- to -a 'gbee- 'ka, -kɔ bhë =nE 'wo dho sɔ 'puu bhë -a =daa' wo -bha 'pö, n 'ka 'dho -an 'tɔ bho -kë -a 'gü -sü 'sëedhe -be 'gü; a -dho -a pö n Dë waa- ö -bha bɔmE -nu 'dhiö =nE -wo n -ma 'ka.

⁶ Kö mE 'ö- 'wun ma 'to 'dhö -dhö, pë 'ö -Zuu 'slöösLö 'dhoë- =blE' -na Yesu -wun -dhe 'wun gia- -mE -nu -dho 'kuë- -sü -dhe =nE -ya ma!»

'Sëedhe 'ö dho Yesu -wun -dhe 'wun gia- -mE -nu -dho 'kuë- -sü 'ö FiladEefi -a 'piö

⁷ 'Yö- pö n -dhe 'zü =nE: «-Bhö 'sëedhe bɔ 'dhiö -sü -Zlan -bha mE -nu 'ka -mE 'ö Yesu -wun -dhe 'wun gia- -mE -nu -dho 'kuë- -sü 'ö FiladEefi -a -dhe =nE: ME 'ö 'slöösLö 'ö 'wun giagia 'ka, mE 'ö -gludë Davidö -bha =lakele 'dhoë- -gɔ, 'ö =ya 'kwE ta, 'ö- 'po -mE gbE 'yaa 'dhö, 'ö =ya 'kwE 'po 'ö- ta -mE gbE 'yaa 'dhö bhë -ya -pö: ⁸Pë -nu 'ü- kë -na 'töüdhö bhë a- -dɔ. A- =dɔa' =nE =faan' 'ö ü -gɔ bhë, -yö 'tee; 'KEE kë- wo 'dhö bhë, ü 'wun -ma n -wo -ta, 'ü to -klu -sü 'ka n -ma; 'ma 'kwE do 'po ü -gɔ; mE gbE 'ka 'dho -mɔa -bha kö -ya 'dhi ta ü -gɔ.

⁹ Dü -bha -kpakuemE -nu, =suame -nu 'wo wo -de kë -na Zuifö 'ka, 'KEE kö 'waa Zuifö 'ka bhë, pë 'a dho -a kë -an 'ka 'ö tɔɔ: A -dho -an 'gbee- -ta bho 'wo nu 'wo -lo wo kpɔn 'gü ü 'dhiö ü =bhlë -ya -sü 'ka. Bhii kö =waa- dɔ =nE ü -dho -yö n -kë. ¹⁰=Dhe 'ö -kë =nE ü ü -zo -kë n -wo -nu 'a- nu bhë -an 'piö, =zuö' -kë -saa -sü 'ka bhë, kö ma -de 'pö, a -dho n -zo kë ü 'piö 'yena 'yö 'dhoë- nu 'kpongtaa kö 'kpongtaame -nu -waan bɔ 'güdandhe 'gü bhë -a 'töng

'yö dho kaa bhë -a 'ka. ¹¹ A nu -na; pë -nu 'wo ü -gɔ bhë, -bhö ü -zo kë -an 'piö -yö kë 'dhö kö =kun mɛ 'kpaan gbɛ dho -to -a 'gbee- 'ka 'gɔ =gblaa' 'ö -ya ü -bha 'ka bhë -a kun ü -gɔ! ¹² Mɛ 'ö 'dhoë- to -a 'gbee- 'ka, a -dhoë kë n -ma -Zlan -bha 'kɔ -gban 'lü 'ö yaa 'dho yö plaan gbɔ -a 'ka; a -dho n -ma -Zlan 'tɔ waa- n -ma -Zlan -bha pödhe 'tɔ -ya -a -bha. Pödhe bhë 'ö tɔɔ Zeluzalɛmë -dhɛ -dëü 'yö dho go dhang- 'gü, n -ma -Zlan 'piö. 'Tɔ -dëü 'ö n -ma zlöö =nɛ a -dho -a -ya -a -bha 'pö.

¹³ Kö mɛ 'ö- 'wun ma -to 'dhö -dhö, 'wun 'ö -Zuu 'slööslö 'dhoë- =blɛɛ' -na Yesu -wun -dhɛ 'wun gia- -mɛ -nu -dho 'kuë- -sü -dhë =nɛ -ya ma!»

'Sëedhe 'ö dho Yesu -wun -dhɛ 'wun gia- -mɛ -nu -dho 'kuë- -sü 'ö Laodise -a 'piö

¹⁴ 'Yö- pö: «-Bhö 'sëedhe bɔ 'dhiö -sü -Zlan -bha mɛ -nu 'ka -mɛ 'ö Yesu -wun -dhɛ 'wun gia- -mɛ -nu -dho 'kuë- -sü 'ö Laodise -a -dhë =nɛɛ: Mɛ 'wo- -dhɛ Amɛn, 'yö =goo- -to -wo 'gü -sü -zë 'ka, 'yö 'wungiamɛ 'ka, yö 'ö pë 'ö -Zlan -ya -da 'töüdhö 'yö- -bɔa -ta 'ka, -ya -pö: ¹⁵ Pë -nu 'ü- -kë 'töüdhö bhë a- -dɔ. A- =dɔa' =nɛ 'bhaa -saa 'iin 'bhaa 'siözë. -Yö -dho kë n -dhë -së -be kö pë =plɛ 'wo bhë 'ü- do 'sü 'ü kaa 'gbönggböng. ¹⁶ 'Kɛɛ 'ö -kë =nɛ ü 'zɔzɔ, 'ö 'bhaa -saa 'iin 'bhaa 'siö- bhë kö a -dho -pe ü 'ka =nɛ -kɔ 'ö 'yi 'zɔzɔ 'dhö -pë -da -na -a 'ka mɛ 'ka bhë -a 'dhö. ¹⁷ 'Ö tɔɔ ü -pö ü -bhɔɔzë, 'go mü ü -bha 'wun -nu -wo 'dho -na 'dhiö, 'iin pë gbɛ -wun 'yaa ü kë. 'Kɛɛ ü 'yenazë, 'ö 'bhaa -tɛi' dɔ. Ü 'fɛɛzë, 'ü ü 'kpaan 'ka 'ö ü 'yënnng 'dho tii. ¹⁸ =Dhe -kë 'dhö, 'a ü =kpaɔ -na kö 'ü 'sënnng 'ö =ya kë 'slööslö 'siö 'ka bhë 'ü- 'dho n -gɔ kö 'üën- kë =bhɔɔzë giagiawo. -Bhö sɔ 'puu -nu 'dho 'pö 'ü- kë ü -bha kö -yaan ü -bha -to 'kpaan -sü lë- -nu -ta -bin. 'Ü -yö 'yënnng pë 'yi 'dho 'ü- yö ü 'yënnng kö 'üën- -dhɛ yö. ¹⁹ Mɛ -nu 'ö -an

-dho -yö n -kë bhë a -an -kun 'gbee- 'a -an -doo. -Bhö pë -nu kë, -kë =naazë -sü 'ka, 'ü 'kan ü -bha =soon yaa -nu -bha! ²⁰ -Bhö -dhe -ga, a do -sü 'ka 'kodhi -bha, 'a 'kwεε -ta -ma -na; =ya kë =nε mε =ya n -wo ma =ya 'kwεε 'po n -gɔ, a -dho -da -a -gɔ kɔɔ, 'a pë -bhö -a 'piö, 'ö yö -de 'pö 'ö pë -bhö n 'piö. ²¹ Mε -nu 'wo 'dhoë- to -a 'gbee- 'ka, a -dho we -a -bha -an -gɔ 'ö 'wo -ya n 'sian 'piö n -ma 'gɔ -gbloo 'gü =nε -kɔ ma -de 'pö 'a toë 'gbee- 'ka, 'ö 'a -ya -sü 'ka -a 'ka n Dë 'sian 'piö, -a -bha 'gɔ -gbloo 'gü bhë -a 'dhö.

²² Kö mε 'ö- 'wun ma -to 'dhö -dhö, pë ö -Zuu 'slööslö 'dhoë- =blεε' -na Yesu -wun -dhe 'wun gia- -mε -nu -dho 'kuë- -sü -dhë =nε, -ya ma!»

4

Mε 'ö -ya -sü 'ka 'gɔ -gbloo 'gü bhë -a gba -kɔ 'ö dhang- 'gü

¹ =Dhe 'ö =ya 'go mü a 'yanpiöpë do 'bhaa -yö. 'A 'kwεε do yö, kö -yö 'po -sü 'ka dhang- 'gü; 'ö -wo do 'a- ma 'dhiö 'ö- -drinng -yö -kë =nε 'truu -wo 'dhö bhë, 'a- ma 'zü 'ö- pö n -dhë: «-Bhö -da 'ü nu zö kö pë -nu 'wo dho kë 'dhiö =zian' 'aan- -zɔn ü -dhë!» ² 'Ö to mü 'ö -Zuu 'slööslö -yö pa n 'ka. 'Ö =dhe 'a- -ga kö 'gɔ -gbloo do -yö do -sü 'ka dhang- 'gü mü. Mε do -yö -kë -ya -sü 'ka 'gɔ -gbloo bhë -a 'gü; ³ 'ö- wöodhe 'bhü -yö -kë =nε -guö -wungbeezë =suu'- 'wo- -dhe 'zasüpë 'ö- bun 'yan dho -gbleibizë 'iin -guö -wungbeezë =suu'- do 'wo- -dhe 'saaduanö 'ö- bun dho nuεazë -an 'dhö. Dha -bhüö 'ö- 'yan 'dho 'bhü -sü 'ka =nε -guö -wungbeezë =suu'- gbε 'wo- -dhe emelodö 'ö- bun -yö -kë -gbleibizë bhë -a 'dhö, -yö -nië -a -bha 'gɔ -gbloo -zü. ⁴ 'Piö -bhɔ =taa' -sü -zë 'ka -a -zü 'to, 'gɔ -gbloo 'gɔɔ- =plε ö ga -yiisië 'bhaa gbε -wo -kë mü. 'Ö mε ziizii 'gɔɔ- =plε ö ga -yiisië 'ö so 'puu 'dhö -an -bha, 'go mü 'ö

'sɛnŋg =gblaa' 'dho -ya -sü 'ka -an -gɔ -bha -wo -kë -ya -sü 'ka -an 'gü. ⁵ 'Ö pë -nu 'wo -kë =nɛ dha -bha 'yan bɔ -sü 'dhö -wo bɔ 'gɔ -gbloo =vaazë 'gü 'ma =zian' 'wo -ziö -blaandhö, 'ö pë -nu 'wo -kë =nɛ dha -bha 'we -sü 'dhö 'wo bɔ -dhɛ do bhë -a 'gü =zian' 'wo -we. 'Ö -zuö -nu -wo bɔ 'ma =zian' 'pö 'wo -we. 'Gbia -be 'slaplɛ -wo -kë 'kun =dhia 'gɔ -gbloo bhë -a 'dhiö mü. 'Gbia -be 'slaplɛ 'wo bhë 'wo tɔɔ -Zlan -bha -Zuu 'slaplɛ. ⁶ 'Gɔ -gbloo 'dhiö mü, pë 'ö -kë =nɛ pë 'wo -vɛdhɛ kë -na -a 'ka -a 'dhö bhë, -a 'yipuë -yö -kë mü, bhii mɛ 'yan- -bɔ -a 'gü =nɛ 'yi 'slööslö 'dhö.

'Gɔ -gbloo ziën waa- -a 'sian 'piö -dhɛ -nu -bha, pë 'bhee- -yiisië 'ö -an 'yan -nu 'dho -mɔ -sü 'ka -an buën- -an 'dhiö =zian' waa- -an =zlöö =zian' -wo -kë mü. ⁷ Pë 'bhee- -nu 'wo bhë -a -blɛɛzë -yö -bhɔ =laa' -bha; -a =plɛ -naa -yö bhɔ -du 'në -bha; a- kë -yaaga -naa wöödhɛ -yö bhɔ mɛ 'bhee- -lü wöödhɛ -bha, 'ö- kë -yiisië -yö bhɔ 'gblübhāa 'ö -lö =dhia -a -bha. ⁸ Pë 'bhee- -nu -yiisië 'wo bhë, -a mɛ 'ö -dhö -a gban -yö 'slado; 'ö -an 'yan -nu 'dhö -lo -sü 'ka -an gban -ta dhuö -dhɛ -nu waa- -an gban -löö -dhɛ -nu -bha. 'Ö 'waa wo bo -a pö -sü 'ka -dhɛ 'po -sü waa- 'bin 'më -sü -an 'gü =nɛɛ: «'Slööslö, 'slööslö, 'slööslö 'yö tɔɔ Dëmɛ -Zlan 'piigbeezë 'yö -kë -dhö, 'yö -dhö, 'yö nu -na.» ⁹ 'Ö =ya kë pë 'bhee- -nu -yiisië 'wo bhë -wo 'tan -nu bho -na kö mɛ 'ö -ya -sü 'ka 'gɔ -gbloo 'gü, 'yö -dhö =toëpö 'ka bhë -waan 'tɔ kë =va, -waan -a =bhlë -ya, 'go mü -waan zuö pö, ¹⁰ 'Ö mɛ ziizii 'gɔɔ- =plɛ ö ga -yiisië 'wo bhë 'wo -lo wo kpɔn 'gü, mɛ 'ö -ya -sü 'ka 'gɔ -gbloo 'gü 'ö -dhö =toëpö 'ka bhë -a wö 'dhiö 'ö 'wo- gba. 'Wo dho wo -bha 'gɔ =gblaa' 'ka 'wo- -lo 'gɔ -gbloo 'dhiö -a pö -sü 'ka =nɛɛ: ¹¹ «'Yi Dëmɛ, yi -bha -Zlan, -yö ü -ma -kun kö 'tɔbhɔdhe, =bhlëyadhe waa- 'piigbeedhɛ -wo kë ü -bha 'ka; bhii bhi =nɛ 'ü pë 'plɛ -da, 'ö -dhi ü -dhë 'ü -këdhösü nu -an -dhë.»

5

'Sëédhε -be 'dhipomε

¹ A 'sëédhε -be 'ö -kë =nε pë -dho 'kou -sü -zë 'dhö -a -yö mε 'ö -kë -ya -sü 'ka 'gɔ -gbloo 'gü bhë -a =kwεε- 'gü -kɔ 'gü mü. Pë -yö -kë -ya -sü 'ka -a 'gü -dhε waa- -a 'pian =zian' -dhε -bha, 'yö 'sëédhε -be 'dhi ta -sü -zë 'ö =duakëpë 'slaplε 'dhö -a -ta ('ö mε do dho -a 'dhi po) -a 'ka. ² A -Zlan -bha bɔmε do 'piigbeezë 'yö 'wun =blεε' -na 'gbee- 'ka -a yö kö -ya pö -na: «Dö 'yö- -ma kun kö -yö =duakëpë -nu 'wo =nε -an =wüü' - kö -yaan 'sëédhε -be 'ö =nε -a 'dhi 'po e?» ³ 'Kεε -a -mε gbε 'yaa -dhö, dhang- 'gü, 'kpongtaadhε, 'iin 'sε =löö kö -yaan 'sëédhε -be bhë -a 'dhi 'po -yaan =kpɔɔ' -a 'gü. ⁴ A 'gbo -bɔ =va 'ka 'ö tɔɔ mε gbε yaa kë -dhö kö -yaan 'sëédhε -be bhë -a 'dhi 'po -yaan -dhε -ga -a 'gü. ⁵ =Dhε =ya kë 'dhö, 'ö mε ziizii -nu 'wo bhë 'ö- mε do -ya pö n -dhë: «Kö =kun 'ü 'gbo bɔ! -Bhö -dhε -ga: =Laa' 'ö Zuda -gɔ 'gunng 'gü, 'ö -gludë Davidö =suutamε 'ka, yö =nε 'ö 'to -a 'gbee- 'ka. Yö =nε 'ö -mɔa kö -yö =duakëpë 'slaplε bhë -an =wüü' - kö -yaan 'sëédhε -be 'ö =nε -a 'dhi 'po.»

⁶ =Dhε 'ö go mü, 'a 'bhlanë -gbɔng do yö kö -yö -dɔ -gεn -ta -sü 'ka 'gɔ -gbloo 'dhiö pë 'bhee- -nu -yiisië waa- mε ziizii -nu 'wo bhë -an ziën. 'Bhlanë bhë -yö -bhɔ pë 'wo -zë -a -bha. -A -sö -nu -wo 'slaplε, 'ö- 'yan -nu 'dhö 'slaplε; wo =nε 'wo tɔɔ -Zlan -bha -Zuu ('slööslö) 'slaplε 'ö -an bɔ 'sε -dhε 'saadhö -a 'gü sia- bhë. ⁷ 'Yö 'bhlanë bhë 'yö -yɔɔn 'sëédhε -be bhë -a -bha, 'yö- sü mε 'yö -ya -sü 'ka 'gɔ -gbloo 'gü bhë -a =kwεε- 'gü -kɔ 'gü. ⁸ =Dhε 'ö -ya 'sëédhε -be 'ö bhë -a 'sü, 'ö pë 'bhee- -nu -yiisië waa- mε ziizii -nu 'gɔɔ- =plε ö ga -yiisië 'wo bhë 'ö -an 'plε -wo -lo wo kpɔn 'gü 'bhlanë bhë -a 'dhiö. Mε 'ö -dhö kɔng do, waa- 'sënnng -kɔɔ -nu 'ö pë 'tëë -sëëzë 'ö -ya kë 'wo- -güö

'ö- pa -wo kë -an -gɔ. Pë 'tëë -sëëzë 'ö bhë 'ö tɔɔ -bhɛa' -wo 'ö -Zlan -bha mɛ -nu -dho 'kuë- -sü -wa wo. ⁹ 'Wo 'tan -dëü bho =woë' =nɛ: «-Yö ü -ma -kun kö 'üën- 'sëëdhɛ -be 'ö =nɛ -a 'sü, 'üën- =duakëpë -nu 'wo bhë -an 'wü. Bhii -wo ü -zë, 'ö 'ü bɔ -a -ta 'ü mɛ -nu 'wo go 'gunng 'saadhö, -wo =suu'- 'saadhö, 'sɛ 'saadhö waa- ö 'gü -mɛ -nu -an -gɔ -ta dhɔ kö -waan kë -Zlan -bha 'ka. ¹⁰ 'Bha -an kë 'sɛgɔ do 'gü -mɛ -nu 'wo slabhome 'ka -an 'ka -waan yuö kë kwa -bha -Zlan -dhë; -wo -dho -gludëdhɛ kë 'kpongtaa.»

¹¹ 'A ko 'zü 'a -dhɛ -ga; 'a -Zlan -bha bɔmɛ -nu 'ö 'wo -kë =nɛ mɛ -vuu =plëëzë -gwaa -vuu =plëëzë 'dhö -an yö kö -wo mü. A -an -yö kö -wo =nië' -sü 'ka 'gɔ -gbloo, pë 'bhee- -nu waa- mɛ ziizii -nu 'wo bhë -an -zü 'to. ¹² -Wo -kë 'tan -nu bho =dhia 'wo- pö -wo 'gbee- 'ka =nɛɛ: «'Bhlanë 'wo- zë bhë -ya -ma -kun kö -yaan 'piigbeedhɛ 'dhö, =bhɔɔpë -nu, -kë 'kpaakpasü -nu waa- 'gügbeedhɛ -nu, =bhlëyasü -nu, 'tɔbhɔdhe -nu waa- 'tɔblüsü -nu -waan kë -a -bha 'ka.»

¹³ 'Go mü 'zü a pë -nu 'ö -Zlan -yö -an -da, 'wo dhang- 'gü, 'wo 'kpongtaa, 'wo 'sɛ =löö, 'wo 'yoo =bhaa, pë -nu 'saadhö 'ö -Zlan -yö -an -da 'wo -dhɛ 'saadhö -a 'gü, -an -wo -ma kö -wo 'tan bho -na =woë' =nɛɛ: «Mɛ 'ö -ya -sü 'ka 'gɔ -gbloo 'gü waa- 'bhlanë, 'tɔsaablüdhe, =bhlëyadhe, 'tɔbhɔdhe waa- 'piigbeedhɛ -wo kë -an -bha 'ka =toëpö 'ka.»

¹⁴ 'Ö pë 'bhee- -yiisië 'wo bhë 'wo- pö: «Amɛn.» 'Ö mɛ ziizii -nu 'wo bhë 'wo -lo wo kpɔn 'gü, ('yö 'bhlanë waa- mɛ 'ö -kë -ya -sü 'ka 'gɔ -gbloo 'gü bhë,) 'wo -an gba.

6

=Duakëpë -nu

¹ 'Go mü 'zü 'a 'bhlanë bhë 'a- yö kö =duakëpë 'slapɛ bhë =yaa- do 'wü; 'ö pë 'bhee- -nu -yiisië 'wo bhë 'a- do

-wo ma kö -ya pö -na -wo 'gbee- 'ka =nE dha -bha 'gbla -wo 'dhö =nEE: «-Bhö nu!» ²=DhE 'a- -ga bhë 'a =soo 'puu do yö. ME 'ö -kë -a =taa bhë 'sɔɔn do -yö -kë -a -gɔ; 'ö 'wo 'gɔ =gblaa' do nu -a -dhë. Yö 'ö -to -a 'gbee- 'ka -mE 'ka bhë, 'yö dho -yaan 'to -a 'gbee- 'ka 'zü.

³'Ö 'bhlanë -yö =duakëpë kë =plE -naa wü; 'a pë 'bhee- -nu 'wo bhë -a kë =plE -naa -wo ma kö -ya pö -na: «-Bhö nu!» ⁴=DhE =ya kë 'pö 'ö =soo do 'ö- bun 'dhö nuεazë bhë 'yö -wo, 'ö mE 'ö -kë -a =taa bhë, 'ö -kɔ -mɔ 'wuën- -sü -yö nu -a -dhë kö -yaan -glu -da 'kpongtaa, -yö kë 'dhö mE -nu -waan wo 'ko -nu zë. 'Wo -dhaa do =va nu -a -dhë.

⁵'Ö 'bhlanë -yö =duakëpë kë -yaaga -naa wü; 'ö 'a pë 'bhee- -nu bhë -a kë -yaaga -naa -wo ma kö -ya pö -na: «-Bhö nu!» 'Ö =dhe 'a- -ga, 'a =soo tii do yö. ME 'ö -kë -a =taa bhë 'kilong kpö do -yö -kë -a kwEE. ⁶'Ö 'a 'we -wo do 'yö go pë 'bhee- -nu -yiisië 'wo bhë -an ziën -a ma =nEE: «=Bluu'- waa- 'klën -an -bi -wun -dho kë 'gbee-. =Bluu'- -bi 'kilong do =sɔnng' -yö -dho kë -gɛn dɔ do =saan' 'ka; kö 'klën -bi 'kilong -yaaga =sɔnng' -yö kë -gɛn dɔ do =saan' 'ka 'pö. 'KEE kö =kun 'ka pa 'yɔn waa- -drɔɔn -an 'ka!»

⁷=DhE 'ö 'bhlanë -yö =duakëpë -yiisië -naa wü, 'ö pë 'bhee- -nu bhë -a -yiisië -naa -de 'pö 'a- -wo ma =nEE: «-Bhö nu!» ⁸=DhE 'a- -ga bhë 'a =soo bun 'yuënyuënzë do yö. ME 'ö -kë -a =taa bhë -a 'tɔ tɔɔ ga, 'ö =glööbɔɔ -yö ziö -a 'piö. 'Wo 'kpongtaamE -nu 'gbu -bha 'gbu nu -a -dhë kö -yaan pë yaa kë -an 'ka -dhaa, din -nu, 'yua -nu waa- wü 'dhiözë 'gügbeezeë -nu -an =kwaa'.

⁹'Ö 'bhlanë -yö =duakëpë 'sɔɔdhu -naa wü. 'Ö mE -nu 'wo -an zë wo -bha -Zlan -wo -dhE 'wun gia- -sü waa- -a -wo =blEE' -sü -wun 'gü bhë, 'a -an nii yö -Zlan -bha sla- -bho -a -ta -pë =löö. ¹⁰-Wo -kë 'gbla -sü 'gü =woë' =nEE: «Yi DëmE, bhi 'ü 'slöösLö, 'ü -dhö 'wun giagia 'ka, ü -dho 'kpongtaamE -nu -bha za kan, 'go mü kö 'üën- mE -nu 'wo

'wun -wo yi -ta, 'yi to -a =kwaa' =nE -an 'klo- bhɔ -më yië =ε?» ¹¹ 'Ö mE 'ö -dhö 'wo gblang 'puu do nu -a -dhë, 'go mü 'wo- pö -an -dhë -wo wo =fuë =kun 'töng 'ö bhë -a 'ka, -yö 'dho -yö yöë -an dhegluzë -nu waa- -an 'bhamE -nu 'wo yuö do bhë -a 'gü 'wo dho -an zë =nE -kɔ 'wo -an zaa -a 'dhö bhë -an -dho 'kuë- -sü 'dhiö -mɔ 'kuë =yië'.

¹² =DhE 'a- -ga kö 'bhlanë -yö =duakëpë kë 'slado -naa 'wü -na. 'Ö 'sɛzluundhe 'gbee- -yö -kë, 'ö lan- -yö -kë tii =nE sɔ tii ga =vaazë do 'dhö. 'Ö 'su -de 'pö 'yö -kë nuεazë =nE fɛi 'dhö. ¹³ 'Ö 'susongga -nu -wo go dhang- -bha 'wo -püö 'sE -ta =nE -kɔ 'ö figö bhE 'ö =tun -kpo 'ö 'tëë 'gbee- =ya -ma -a -bha 'yö =zaan 'zan -na 'ö -püö -na -a 'ka bhë -a 'dhö. ¹⁴ 'Ö dhang- -yö =yɔɔn ö =bhaa =nE -kɔ 'wo 'sëédhE -be kë -na -a 'ka (=nE -kɔ 'wo =sɛE' -be kë -na -a 'ka bhë) -a 'dhö. 'Ö -tɔn -nu 'saadhö waa- 'sE -tɔn -nu 'wo 'yi ziën -an 'plE -wo go wo pin =taa. ¹⁵ -Gludë -nu 'wo 'kpongtaa -nu, 'dhiö -sü mE 'ka -mE -nu, 'dhasi =kɔɔnmE -nu, =bhɔɔmE -nu, 'piigbeedhE -nu, mE -nu 'wo to -nu, mE -nu 'wo 'gan 'gü 'iin 'waa 'gan 'gü -nu, -wo -dho -bin =duudhE -nu waa- guö -tɔn 'gü -dhE -nu -an -bha. ¹⁶ 'Ö 'wo- pö -guö kpö -nu 'iin -tɔn -nu -dhë: «-Ka -lo yi -ta mE 'ö -ya -sü 'ka 'gɔ -gbloo 'gü bhë waa- 'bhlanë -an -bha -naazuédhe -gɔ. ¹⁷ Bhii -an -bha 'wun -naa -an -zuë -yi 'ö yi =va 'ka bhë =ya -lo; dö 'yö dho dha -an -gɔ -ε?»

7

*Izla*elö 'sɛgɔ -gbaan 144.000

¹ =DhE =ya kë 'dhö, a -Zlan -bha bɔmE -nu -yiisië -yö 'sE 'pian -yiisië -bha. 'Yö 'tëë -nu -yiisië 'wo -piö -na 'kpongtaa bhë, 'wo -an kun -yö kë 'dhö kö =kun 'ö 'tëë dho -ma 'sE -ta -dhE, 'yoo =bhaa -dhE, 'lü tuö -dhE -nu 'iin -dhE 'saadhö -a gbE 'gü. ² 'A -Zlan -bha bɔmE do yö kö -yö -da -na dhang- 'gü lan- 'go =zian' kö -Zlan 'bhee- -bha

=duakëpë -ya -gɔ. 'Ö -gbla -wo 'gbee- 'ka -Zlan -bha bɔmɛ -nu -yiisië 'ö -kɔ -mɔ 'wuën- -sü 'dhö -an -gɔ bhë -an -dhë kö -waan 'wun yaa kë 'sɛ waa- 'yoo -an 'ka bhë -an -dhë =nɛ: ³ «Kö =kun 'ka 'wun yaa -kë 'sɛ 'dhö, 'yoo 'dhö 'iin 'lü -nu -an gbɛ 'ka, -yö 'dho -yö yöë yi -bha kwa -bha -Zlan -bha yuökëmɛ -nu -bha =dua' kë -sü -bha!» ⁴ 'Ö 'wo mɛ -nu 'ö -Zlan -bha =duakëpë 'dho -ya -sü 'ka -an -kpong 'gü bhë 'wo -an -dho 'kuë- -sü 'tɔ pö n -dhë: -An -dho 'kuë- -sü -yö -kë -vuu =këng' do waa- mɛ -lü -vuu 'gɔɔ- -yiisië ö ga -yiisië (144.000) 'wo go Izlaelö 'gunng 'saadhö -a 'gü. ⁵ Mɛ -lü -vuu 'gɔɔ- do ö ga =plɛ 'wo go Zuda -gɔ 'gunng 'gü 'ö =duakëpë -yö -ya -an -bha; Lubɛn -bha -vuu 'gɔɔ- do ö ga =plɛ, Gadö -bha -vuu 'gɔɔ- do ö ga =plɛ, ⁶ Aseɛ -bha -vuu 'gɔɔ- do ö ga =plɛ, Nefötali -bha -vuu 'gɔɔ- do ö ga =plɛ, Manase -bha -vuu 'gɔɔ- do ö ga =plɛ, ⁷ Simeɔn -bha -vuu 'gɔɔ- do ö ga =plɛ, Levi -bha -vuu 'gɔɔ- do ö ga =plɛ, Isakaa -bha -vuu 'gɔɔ- do ö ga =plɛ, ⁸ Zabilɔn -bha -vuu 'gɔɔ- do ö ga =plɛ, Zozɛfu -bha -vuu 'gɔɔ- do ö ga =plɛ, 'ö Bɛnzamɛ -bha -yö kë -vuu 'gɔɔ- do ö ga =plɛ.

Mɛ gbung =va

⁹ =Dhɛ 'ö =ya kë 'dhö, a -dhɛ -ga 'zü 'a mɛ gbung =va yö: 'Ö mɛ gbɛ yaa kë -dhö kö mɛ -nu 'wo -kë wo 'ko =bhaa mü -yaan -an =dhong'-. -Wo -kë mɛ -nu 'wo go 'sɛ 'saadhö, 'gunng 'saadhö, 'sɛgümɛ -nu 'saadhö waa- wo =suu'- -ta 'saadhö -a pö -mɛ -nu 'ka. -Wo -kë dɔ -sü 'ka 'gɔ -gbloo waa- 'bhlanë -an 'dhiö; gblang 'puu -yö -kë -an -bha, 'ö =glaa- -paa -nu -wo -kë -an kwɛɛ. ¹⁰ -Wo -kë 'gbla -sü 'gü 'gbee- =woë' =nɛ: «Kwa -bha dha -sü -yö -go kwa -bha -Zlan 'yö -ya -sü 'ka 'gɔ -gbloo 'gü waa- 'bhlanë -an kwɛɛ!» ¹¹ -Zlan -bha bɔmɛ -nu 'saadhö -wo -kë 'gɔ -gbloo bhë, mɛ ziizii -nu waa- pë 'bhee- -nu -yiisië 'wo bhë -an -zü 'to 'wo -lo 'gɔ -gbloo 'dhiö mü

-gɔ -gblü 'sɛi -sü 'ka 'ö 'wo -Zlan gba ¹² -a pö -sü 'ka =nɛɛ: «Amɛn! 'Tɔsaablüdhe, 'tɔbhɔdhe, 'kpaakpadhe, =sɛɛbhodhe, mɛsüvasü, 'piigbeedhe waa- 'gügbeedhe -wo kwa -bha -Zlan -bha 'ka =toëpö 'ka! Amɛn.»

¹³ 'Ö mɛ ziizii -nu 'wo bhë 'ö- mɛ do -yö n =dhɛɛ' kɔɔ =nɛɛ: «Dö -nu 'ö gblang 'puu -nu 'dho -an -bha =nɛɛ, 'go mü -wo -go mē =ɛ?» ¹⁴ 'A- -daa -kë -a -gɔ =nɛɛ: «Ma -zë 'maa- dɔ -ɔ, n Dɛmɛ; bhi =nɛ 'ü dho -mɔa -bha kö 'üɛn-dɔ.» =Dhe =ya kë 'dhö, 'yö- pö n -dhë: Mɛ -nu 'wo bɔ 'klobhɔdhe =va kwɛɛ wo -mü. -Wo wo -bha gblang -zlu -a -kë 'slööslö -sü 'ka 'bhlanë fɛi 'ka. ¹⁵ Pë 'ö -kë 'ö 'wo dɔ -Zlan -bha 'gɔ -gbloo 'dhiö, yuö -kë -Zlan -dhë -sü 'ka gbeng waa- lɛnng -a -gɔ kɔɔ 'ö bhë, 'ö mɛ 'ö -ya -sü 'ka 'gɔ -gbloo 'gü 'ö dho ö -zo kë -an 'piö. ¹⁶ Din -nu, 'yi mü -dho -nu, -an gbɛ 'ka 'dho -an kë gbɔ; 'iin lan- -nu, 'siö 'gbee- -bha -dɔ mɛ -ta -sü -nu gbɛ 'ka 'dho -an kë gbɔ. ¹⁷ Bhii 'bhlanë 'yö 'gɔ -gbloo ziën bhë -yö -dho kë -an -maakëmɛ 'ka, 'yö dho -an 'ka -kë -a 'gü -yi 'tɔɔ- =bhaa. 'Go mü -Zlan -dho -an 'yɛnng 'plɛ =dhuë'.

8

=Duakëpë 'slaplɛ -naa

¹ =Dhe 'ö 'bhlanë -yö =duakëpë kë 'slaplɛ -naa wü, -dhɛ -yö ga diindhö dhang- 'gü 'yö -mɔ 'lɛɛ 'gbu -bha. ² 'Ö 'a -Zlan -bha bɔmɛ -nu 'slaplɛ yö, kö -wo dɔ -sü 'ka -Zlan 'dhiö; 'wo 'truu 'slaplɛ nu -an -dhë.

³ 'ö -Zlan -bha bɔmɛ do -yö nu 'yö dɔ -Zlan -bha slabhodhe 'sɔɔ. 'Güö -pë 'tëë -sëëzë -yö -a 'gü -pë 'ö 'sɛnng 'ka bhë -yö -kë -a kwɛɛ, 'ö 'wo 'güö -pë 'tëë -sëëzë bhë 'wo -nu -a -dhë =va kö -yaan kpa -Zlan -bha 'sɛgɔgümɛ -nu 'slööslö -bha -bhɛa' -wo -bha -yaan sla- bhoë slabhodhe 'ö 'sɛnng 'ka, 'gɔ -gbloo 'dhiö bhë -a -ta. ⁴ Pë 'tëë -sëëzë bhë, -a 'güö -sü 'ka, -a 'siɔn waa- -Zlan -bha mɛ -nu 'ö -an

sü ö -bha 'ka -an -bha =bhεa' -wo -wo -luu 'kuë -Zlan -bha bɔmε bhë -a kwεε -Zlan wö 'dhiö mü. ⁵ =Dhε =ya kë 'dhö, 'ö -Zlan -bha bɔmε -yö pë 'tëë -sëëzë -yö -a 'gü -pë 'ö bhë, 'yö- pa 'siö 'ö slabhodhε -bha mü bhë -a 'ka; 'yö- zuö sia-. 'Ö dha -nu -wo -we; 'we -wo -nu, pë -bha 'yan bɔ -sü -nu waa- 'sε -bha =zluun -sü -nu -wo -kë.

⁶ 'Ö -Zlan -bha bɔmε 'slapε 'ö 'truu 'slapε 'dho -an kwεε bhë 'wo yö wo =baa' -sü -bha kö -waan 'truu -piö.

⁷ 'Ö -Zlan -bha bɔmε -blεεzë -yö 'truu -piö. 'Ö mëngga -nu waa- 'siö 'ö fεi -yö =kaan -a 'ka, -wo -lo 'kpongtaa. 'Ö siadhε 'bhaa -nu, 'lü 'bhaa -nu 'wo -güö -dhε -nu 'gü, -dhε -nu 'gü 'kpongtaa 'wo dho -mɔ -a 'fa bho 'gü -yaaga 'pian do -bha. 'Ö =blëë' -nu 'wo -güö 'töüdhö.

⁸ 'Ö -Zlan -bha bɔmε kë =plε -naa -yö ö -bha 'truu -piö. 'Ö pë 'ö -kë =nε -tɔn =suu' -do =va 'ö 'siö 'dhö -a -bha, 'yö -zuö 'yoo =bhaa, 'ö 'yoo 'pian do 'ö -mɔ -a 'fa bho 'gü -yaaga -bha -yö -gla fεi 'gü. ⁹ 'Ö 'të -pë 'saadhö 'wo 'yoo 'pian 'ö bhë -a -bhaa, 'ö 'wo ga; 'ö 'yi -ta -gɔ -nu 'wo -dhε bhë -a 'gü 'wo -siö.

¹⁰ 'Ö -Zlan -bha bɔmε kë -yaaga -naa -yö 'truu -piö. 'Ö 'susongga do =va 'ö -kë 'güö =dhia =nε 'gbia -dɔɔ 'dhö -yö -go dhang- 'gü 'yö -püö 'yiga =vava -nu waa- 'yigɔbhɔdhε -nu 'wo 'kpongtaa -an -bhaa -dhε -nu 'gü, 'ö -an -dho 'kuë- sü -yö -mɔ -an 'fa bho 'gü -yaaga 'pian do -bha -dhε -nu -bha. ¹¹ 'Susongga 'ö bhë -a 'tɔ tɔɔ «Pë 'güüzë». 'Ö -wun 'gü, 'ö 'yi -dhε 'pian -nu 'wo 'dhö bhë 'wo -kë 'güüzë; 'kpongtaame -nu -dhε =va -dhε -wa mü; 'yö 'wo ga.

¹² 'Ö -Zlan -bha bɔmε kë -yiisië -naa -yö 'truu -piö. 'Ö lan- -bha 'bhü -sü -yö -kan 'pian 'fa bho 'gü -yaaga -bha; pë do bhë 'ö =kaa' 'su waa- 'susongga -nu -an -gɔ 'pö. 'Ö -dhεpuudhε yaa kë -dhö -dhε 'po yi 'gü -glu 'gü dhe -yaaga kpö do 'ka, 'ö 'töng mε 'ö bhë 'ö to -dhεtiidhε 'ö trö 'sënsëndhö -a 'gü. -Kɔ do bhë 'ö =kaa' gbeng -bha 'ka;

'ö gbeng 'gü -glu 'gü dhe -yaaga 'ka 'ö 'susongga -nu waa bhüë.

¹³ 'Yö =dhε 'a- ga 'zü, 'a 'gblübhaa do yö kö -yö =nië' -na dhuö =gbiin. -Yö -kë -a pö =dhia =woë' 'gbee- 'ka =nε: «-Më 'yena -wun oo, -më 'yena -wun oo, -më 'yena -wun 'ö dho kë mε -nu 'wo 'kpongtaa -an 'ka, yi 'ö -Zlan -bha bōmε -nu -yaaga 'wo to =nε 'wo dho 'truu -piö -a 'ka -a 'ka 'dhö -oo!»

9

¹ 'Ö -Zlan -bha bōmε kë 'sōodhu -naa -yö 'truu -piö. 'Ö 'susongga do -yö go dhang- 'gü, 'yö -püö sia-; 'a- yö; 'wo -glu 'kpa 'dhi =va -yö -a 'dhiö -pë =lakele nu -a -dhë. ² 'Ö 'susongga 'ö bhë 'ö -glu 'kpa 'dhi =va bhë -a 'dhi -po, 'ö 'sion =va 'ö -kë =nε 'sion 'ö 'go -na =bluu'- -kë -a 'gü -kō 'gü bhë -a 'dhö 'ö =luu 'ö lan- waa- plaan 'puu 'piö -dhε -wo -trö 'sion 'yö go -glu 'kpa 'dhi =va 'dhi 'gü bhë -a =kwa'. ³ 'Ö 'peedhekpaa -nu -wo go 'sion 'ö bhë -a 'gü 'wo -pεn 'kpongtaa sia- -dhε -nu -bha; 'ö -kō -mō 'wuën- -sü -yö nu -an -dhë kö -waan mε -nu 'kun =nε gian -nu 'dhö. ⁴ 'Wo- pō -an -dhë kö =kun 'wo 'wun yaa gbε -kë =blëë' -nu, 'lü -nu waa- tapë -nu -an gbε 'ka; 'kεε mε -nu 'ö -Zlan -bha =duakëpë 'yaa -an -kpong -bha =nε 'wo dho 'wun yaa kë -an 'ka. ⁵ -Kō -mō 'wuën- -sü yaa nu 'peedhekpaa -nu -dhë kö -waan mε -nu zë, 'kεε kö -waan mε -nu 'yënnng bhō =zian' 'su 'sōodhu 'piö. 'Yënnngbhōdhe 'ö 'dhoë- nu -an -ta bhë, -yö -dho kë =nε gian -bha mε 'kun -sü 'dhö. ⁶ 'Su 'sōodhu 'tōng 'ö bhë -a 'ka, mε -nu -wo -dho ga =mεε'-, 'kεε wo 'ka 'dho -a wo; -wo -dho -a -dhō kaa kö 'wo ga, 'kεε ga -yö -dho =duëë -an -dhë.

⁷ 'Peedhekpaa -nu 'wo bhë -wo -bhō =soo -nu 'ö =wa -mō -glu gōn -sü -bha -an -bha. Pë 'ö -kë =nε 'sënnng 'gō =gblaa' -nu 'dhö -wo -kë -an tuö; -an wöōdhε -yö -bhō mε 'bhee-

wöödhε -bha. ⁸ -An -bha wun -nu -wo -kë =nε dhoo -nu -bha wun 'dhö, 'ö -an 'sɔn -nu -wo -kë =nε =laa' 'sɔn 'dhö. ⁹ -An -kënngtadhε -yö -kë =nε -gluë 'dhaa- -piö -ta -dhε 'dhö; -an gban -drinng -yö -kë =nε -yaagüpë -nu 'wo- -klu -na =soo -nu -bha, 'ö =soo -nu 'dho -an 'gan -na 'wo 'dho -na -glu 'piö bhë -an ziö -drinng 'dhö. ¹⁰ -An weng -yö -dhö =nε -kɔ 'ö gian -nu -bha 'dhö -a 'ka bhë -a 'dhö, 'ö 'wo mε kun -a 'ka. -An weng -nu 'wo bhë =nε 'wo pë yaa =kaa' mε -nu 'ka 'su 'sɔɔdhu 'piö. ¹¹ 'Ö -an -gɔ 'dhiö, -gludë do 'ö -kë bɔmε 'ö go -glu 'kpa 'dhi =va 'gü -a 'ka, -yö yö -an -dhë 'dhiö. -A 'tɔ tɔɔ Eblö -wo 'gü Abadɔn, 'ö Glεkö -nu -wa -dhε Apolion, (-a -gεn 'ö tɔɔ «Pëgüsiömε»).

¹² 'Yena -wun -blεεzë =ya ziö, =ya 'go mü 'yena -wun =plε 'bhaa -wo -dho nu.

¹³ 'Ö -Zlan -bha bɔmε kë 'slado -naa -yö 'truu -piö. 'A 'we -wo do ma; -yö -go slabhodhε 'ö 'sënnng 'dhö 'më -sü 'ka -a -bha 'ö -Zlan 'dhiö -dhε -bha bhë -a 'sian -nu 'piö. ¹⁴ 'We -wo 'ö 'dhö bhë, -ya -pö -Zlan -bha bɔmε kë 'slado -naa 'ö 'truu -yö -kë -a kwεε bhë -a -dhë: «-Bhö bɔmε -nu -yiisië 'wo =yɔɔ' 'gü 'yiga =va 'wo- -dhε öflatö bhë -a 'sɔɔ bhë -an bho =yɔɔ' 'gü.» ¹⁵ 'Wo dho 'ö bɔmε -nu -yiisië 'wo bhë 'wo -an bho =yɔɔ' 'gü. -Wo -kë =baa' -sü 'ka 'gbönggböng -kwε 'ö 'dhö bhë, 'su 'ö 'dhö bhë, yi 'ö bhë -a 'ka, 'töng gia- bhë -a 'ka -yö kë 'dhö kö mε -nu 'wo 'kpongtaa zö, -waan -a 'gügludhe -yaaga kpö -ta do zë. ¹⁶ 'Ö 'dhasi waa- =soo -nu -dho 'kuë- -sü bhë 'wo- -zɔn n -dhë. -An -dho 'kuë- -sü tɔɔ -vuu 'gü -vuu -këng' =plε. ¹⁷ 'Yanpiöpë bhë -a 'gü, -kɔ 'a =soo -nu waa- wo -yaataamε -nu -an yöë bhë 'ö =nε: -Glu gɔn -piö 'bhεi 'në nuεazë 'ö -kë =nε 'siö 'dhö, 'yö 'budhazë =nε -guö -wungbeeze 'wo- -dhε safii -a bun 'dhö, 'ö zënzënzë =nε pë 'tëë yaazë 'ö -kë blɔɔn 'ka 'wo- -dhε blɔɔn bhë -a 'yan 'dhö -yö -kë -an -bha. =Soo -nu -gɔ -yö -kë =nε =laa' -nu -gɔ 'dhö. 'Ö 'siö

-nu, 'siö 'tëe -nu, pë 'piɔɔpiɔɔ 'ö -kë =nE blɔɔɔn 'tëe yaazë 'dhö -wo go -an dhiö. ¹⁸ 'Ö mE -nu 'wo 'kpongtaa bhë 'ö -an 'gü -glu 'gü dhe -yaaga 'pian do -wo ga pë -yaaga 'wo -kë 'siö 'dhö, 'siö 'tëe waa- blɔɔɔn 'tëe yaazë 'ö 'wo 'go -na =soo -nu bhë -an dhiö bhë -an =kwaaw'. ¹⁹ Bhii =soo -nu -bha -kɔ -mɔ 'wuën- -sü -yö -go -an dhiö -dhe, waa- -an weng -an 'gü. -An weng -nu -wo -bhɔ =mEε -bha, 'ö -an -gɔ 'dhö -an 'dhiö; -an weng -nu -gɔ bhë =nE 'ö 'wo 'wun yaa =kaa' mE -nu 'ka.

²⁰ Mε 'bhee- -nu mE 'wo to, mE -nu mE 'ö waa ga pë -nu 'wo =nE -an =kwaaw' bhë, waa 'dho go wo -de këpë yaa -nu -zü. Waa 'dho wo =kwaaw' -zuu yaa -nu gba -sü waa- 'sënnng gbapë nu, 'wëü- gbapë -nu, zën gbapë -nu, -guö gbapë waa- 'lü gbapë -nu, 'ö waa 'dho -mɔ -a -bha kö -waan -dhe yö -waan 'wun ma 'iin -waan 'ta 'sü bhë -an gba -sü -zü. ²¹ Mε -nu 'wo bhë waa 'dho go 'zü wo -bha mE zë -sü -nu, 'gina kë -sü -nu, =sɔɔɔn kë -sü -nu 'iin -an -bha =kwaan -sü -nu -an -zü.

10

-Zlan -bha bɔmE waa- 'sëedhe -be 'tee do

¹ =DhE =ya kë 'dhö, a -Zlan -bha bɔmE do 'piigbeeze -yö, kö -yö 'go -na dhang- 'gü. Dha kpö -yö -kë -a -bha, 'ö dhabhüö do 'dho -nië -a -gɔ -zü -sü 'ka. -A wöödhE -yö -kë =nE lan- 'dhö; 'ö- gEɔ -nu -wo -kë =nE 'siö =gban 'lü 'dhö. ² 'Yö 'sëedhe -be 'tee do 'ö- 'dhi 'dho 'po -sü 'ka, 'yö -kë -a kwEε. 'Yö ö =kwEε- 'gü -gEɔ yö 'yoo -ta; 'yö ö =kwaaw- 'gü -gEɔ yö 'sE -ta. ³ 'Yö -gbla 'gbee- 'ka =nE =laa' -bha pë =bhöü- =mEε' -wo 'dhö. =DhE =ya yën 'we -sü -bha, 'ö dha 'slaple -wo -we =nE mE -we =dhɔɔ -wo -bha 'gbee- 'ka. ⁴ =DhE 'ö =wa yën 'we -sü -bha, 'a dho 'a -ya pë -ya -sü -bha. 'KEε a -wo do 'bhaa -ma dhang- 'gü, 'yö- pö n -dhë:

«-Bhö pë 'ö dha 'we -wo 'slaple -wa pö bhë, -a -ta -bin; kö =kun 'ü- =bεεn!»

⁵ =Dhε =ya kē 'dhö, 'ö -Zlan -bha bɔmε 'a- yö kö =ya =luu'- 'yoo waa- 'sε -an -ta bhë, 'yö ö =kwεε- 'gü -kɔ =luu dhang- 'gü =zian'. ⁶ 'Ö ö -wo -bhö -Zlan 'ö -dhö =toëpö 'ka, 'ö dhang- waa- pë -nu 'wo- 'gü 'töüdhö, 'sε waa- pë -nu 'wo -an -ta 'töüdhö, 'yoo waa- ö =bhaapë -nu 'töüdhö -an -kë bhë -a 'tɔ 'ka. 'Ö -Zlan -bha bɔmε bhë 'yö- pö: «'Töng gbε yaa 'dho kē -dhö kö -waan dɔ -a -gɔ. ⁷ 'kεε yi 'ö -Zlan -bha bɔmε kē 'slaple -naa 'dhoë- 'truu -piö -a 'ka bhë =nε 'ö -Zlan dho ö bha 'slë 'yö -bin -sü 'ka -a 'dhiö -mɔ -a 'ka 'kuë =nε -kɔ 'ö- =blεε -a 'ka ö bha yuökëmε -nu 'wo- 'dhiwopömε -nu 'ka -an -dhë bhë -a 'dhö.»

⁸ 'Yö -wo 'a- ma 'ö go dhang- 'gü bhë, 'ö 'wun =blεε n -dhë 'zü -dëüwo =nεε: «-Bhö 'dho 'ü 'sëédhε -be 'teete 'ö- 'dhi 'dho 'po -sü 'ka, 'ö -Zlan -bha bɔmε mε 'ö dɔ -sü 'ka 'yoo waa- 'sε -an -ta -a -gɔ bhë, 'ü- 'sü -a -gɔ!» ⁹ 'A dho -Zlan -bha bɔmε bhë -a 'piö 'a- pö -a -dhë -yö n gbaa 'sëédhε -be 'teete bhë -a 'ka; 'yö- pö n -dhë: «-Bhöë 'sü, 'ü- -bhö! -Yö -dho kē 'slëénslën ü dhiö =nε 'zɔ 'yɔn 'dhö, 'kεε 'bha yën -a =yɔɔ' -sü -bha, -yö -dho kē 'güüzë ü 'guu.» ¹⁰ 'Ö 'sëédhε -be 'teete bhë, 'a- sü -a kwεε, 'a- -bhö. -Yö -kë n dhiö =zian' 'slëénslën =nε 'zɔ 'yɔn 'dhö; 'kεε =dhε 'ma yën -a =yɔɔ' -sü -bha, -yö -kë 'güüzë n 'guu.

¹¹ =Dhε -kë 'pö 'wo- pö n -dhë: «Ü -dho ko 'zü 'ö -Zlan -yö pë bho -bin -blü ü -dhë, 'ö -gban 'sεgɔ -nu waa- ö 'gü -mε -nu, -wo =suu'- 'oo =suu'- waa- -gludë -nu -an -bha 'ü- =blεε 'zü.»

11

'Wun 'ö -gban =goo- =plε -nu -bha

¹ =Dhε =ya kē 'pö, 'wo -dhε -nu -dan -a 'ka 'lü 'në do nu n -dhë 'ö 'wo- pö n -dhë: «-Bhö =luu'-, kö -Zlan -bha 'kɔ

waa- -a -bha slabhodhe bhë, 'ü -an dan -a 'ka; mE -nu 'wo -Zlan gba -na -a -gɔ kɔɔ bhë -an =dhong'-'! ² 'KEE -bhö ü =kwa' -Zlan -bha 'kɔ 'kweandhe plaandhe -zü; kö =kun 'ü- dan, bhii -yö nu -sü 'ka mE 'waa -Zlan -bha mE -nu 'ka -an -dhë, kö pödhe 'slööslö 'ö Zeluzalemë 'ka bhë -waan -a =siö'- 'su 'gɔɔ- -yiisië ö ga =plE -bha. ³ A -dho ma =goo- =plE 'ö ga -ta -sɔ 'dhö -an -bha -an bɔ kö -waan -Zlan 'dhi -wo =blE'-, -dhekpaoyi -vuu do ö -ta =plE waa- -dhekpaoyi 'gɔɔ- 'slado (1.260) -an 'ka.»

⁴ =Goo- =plE 'wo bhë 'wo tɔɔ olivie -lü =plE waa- =labang =plE 'wo dɔ -sü 'ka kwa DëmE -Zlan 'ö 'kpongtaa kë -mE 'ka -a 'dhö. ⁵ ME =yaa- pö 'yö 'wun yaa kë -an 'ka, 'siö -yö -go -an dhiö 'ö -an yaagümE 'gü =siö; -kɔ bhë =nE 'ö mE -nu 'wo 'dhoë- 'wun yaa kë -an 'ka 'wo dho gaa. ⁶ -Kɔ -mɔ 'wuën- -sü -yö -an -gɔ kö -waan dhang- 'dhi ta, -yö kë 'dhö kö =kun 'ö dha dho ban 'töng 'wo dho -Zlan 'dhi -wo =blE -a 'ka bhë -a 'ka; -kɔ -mɔ 'wuën- -sü -yö -an -gɔ kö -waan 'yi -nu 'gla fëi 'gü. -Kɔ -mɔ 'wuën- -sü -yö -an -gɔ 'pö kö -wo 'wun 'gbee- -nu wɔ 'kpongtaadhe -ta -kɔ =suu'- 'oo =suu'- -ta =nE -kɔ 'ö -dhi -a 'ka -an -dhë -a 'dhö.

⁷ Yi 'wo 'dhoë- yën wo -bha 'wun =blE'- -sü -bha, wü 'ö go -glu 'kpa 'dhi =va 'gü bhë -yö -dho nu -an -gɔ. 'Yö to -a 'gbee- 'ka -an -ta; 'yö -an zë. ⁸ -An =glöö -dho to -kpinngga 'piö pödhe =va 'ö 'wo -an DëmE dɔa -gaatalü -bha bhë -a 'gü. Pödhe 'ö bhë =nE 'wo- -ga zlöö =nE Sodömë 'iin =nE Ezitö -sE -an 'dhö. ⁹ ME -nu 'wo 'sEgɔ 'saadhö 'gü, 'wo 'gunng 'saadhö 'gü, 'wo -wo =suu'- 'oo =suu'- pö waa- 'sEgümE -nu 'saadhö -wo -dho -an =glöö -ga -dhekpaoyi -yaaga waa- ö 'gbu 'ka 'ö waa 'dho 'we -a -bha kö -wo -an =glöö -bin. ¹⁰ 'SägümE -nu =züö' 'glu dho dhi mE =plE 'wo bhë -an -bha ga -sü -wun 'gü. -Wo -dho =züögludhi kë, 'wo gbaɔ -nu bɔ wo 'ko -nu -dhë, bhii 'ö tɔɔ -Zlan 'dhiwöpömE =plE 'wo bhë kö =wa 'sEgümE -nu

dɔ -gbɔudhö. ¹¹'kɛɛ =dɛ -dɛkpaɔyi -yaaga waa- ö 'gbu 'ö bhë =ya ziö, 'ö -këdhösü 'tëë 'yö go -Zlan 'piö 'yö -da -an 'gü, 'ö 'wo =luu 'wo dɔ wo -gɛn -ta. 'Ö 'suö =va -yö -da mɛ -nu 'wo wo 'yan dɔ -an -bha -an 'gü. ¹²'Ö -Zlan 'dhiwopömɛ =plɛ 'wo bhë 'wo -wo do 'gbee- 'yö go dhang- 'gü -a ma =nɛɛ: «-Ka -da zö!» 'Wo -da dhang- 'gü, dha kpö 'ka kö -an yaagümɛ -nu -wo -an -ga -sü 'gü. ¹³-A 'töng gia- bhë -a 'ka 'sɛzluundhe 'gbee- -yö -kë; 'ö pödhe bhë -a 'gü -kan 'kou kpö kë 'gɔɔ- do -naa bhë 'ö- 'plɛ -yö -lo. 'Ö mɛ -lü -vuu 'slaplɛ -wo ga 'sɛ -bha =zluun -sü do bhë -a =kwaa'. Mɛ -nu 'wo to, 'suö -yö -da -an 'gü; 'wo yö -Zlan 'yö dhang- 'gü -a 'tɔ -kë =va -sü -bha.

¹⁴'Yena -wun kë =plɛ -naa =ya ziö; ('kɛɛ -ka ka -zo kë ka -de 'piö!) -A kë -yaaga -naa -dho nu.

'Truu kë 'slaplɛ -naa

¹⁵=Dɛ =ya kë 'dhö, 'ö -Zlan -bha bɔmɛ kë 'slaplɛ -naa -yö 'truu -piö; 'ö -wo -nu -wo -we 'gbee- 'ka dhang- 'gü 'wo- pö: «-Gludëdɛ kë -sü 'ö 'kpongtaa zö =nɛ =ya 'to kwa Dëmɛ waa- Klito -an -bha 'ka zlöö. -Yö -dho 'kpongtaadɛ =kɔɔn =toëpö 'ka!» ¹⁶'Yö mɛ ziizii 'gɔɔ- =plɛ ö ga -yiisië 'wo -kë =yaannu =süë' wo -bha 'gɔ -gbloo 'gü -Zlan wö 'dhiö bhë 'wo -gblü 'sɛi, 'ö 'wo -Zlan gba ¹⁷=woë' =nɛɛ: «Yi Dëmɛ -Zlan 'piigbeeze, bhi 'ü -kë -dhö, 'ü =tun -dhö, yi ü zuö -pö ü -bha -kë =va -sü 'ü- wo 'piigbeedɛ 'ka, 'ü ü -bha -gludëdɛ -kë bhë -a -wun 'gü. ¹⁸-Dɔ 'yënnɔ -sü -yö 'sɛgümɛ -nu -pa; 'kɛɛ -a yi =ya -lo kö ü -bha -naazuëdhe bhë -a 'piö -pë -yaan kë kö game -nu -bha za -yaan 'kan. -A yi =ya -lo kö 'üën- ü bha yuökëmɛ -nu 'wo ü 'dhi -wo =blɛɛ waa- mɛ -nu 'töüdhö 'wo ü -bha 'ka 'wo -suö ü -dhë -yö mɛ =va 'ka 'iin -yö mɛ 'tee 'ka 'üën- mɛ 'ö -dhö -a =saan' bho. Mɛ -nu 'wo 'kpongtaadɛ 'gü =siö bhë, -a yi =ya -lo kö 'üën- -an 'gü =siö'- 'pö.»

¹⁹ =DhE =ya kē 'pö 'ö -Zlan -bha 'kɔ 'ö dhang- 'gü bhē, 'ö- 'dhi -yö -po. 'Ö mE -nu -wo -Zlan -bha tɔŋ =gbēü yö -a -gɔ kɔɔ mü. 'Yö dha -bha 'yan bɔ -sü -nu, pē -drinng -nu, dha -bha 'gbla -wo -nu, 'sE -bha =zluun -sü waa- mēngga 'gbee- -bha -lo -sü -wo -kē.

12

Dhebo 'ö 'gina -yö -ziö -a 'piö

¹ 'Ö =duakēpē do =va -yö -wo dhang- 'gü: Dhebo do 'ö lan- -da ö -bha =nE sɔ 'dhö 'ö 'su 'dho -a -gEŋ =löö, 'go mü 'ö 'gɔ =gblaa' 'ö 'susongga 'gɔɔ- do ö ga =plE 'dho -a -bha 'yö -kē -a tuö. ² -Yö -kē dhe 'guzē 'ö koyigadhe =yaa- 'kun -a 'ka; -yö -kē =gblaa 'gbla =dhia koyigadhe 'yēnngbhɔdhe =kwaä'.

³ 'Ö pē do 'bhaa -yö -wo dhang- 'gü 'zü: -Yö -kē 'gina do -ziizē bun nuEazē 'ö- -gɔ -nu 'dho 'slaplE -a 'ka. -A -sö -nu -wo -kē 'gɔɔ- do. 'Ö 'gɔ =gblaa' 'dhö -ya -sü 'ka -a -gɔ 'ö -dhö do do 'ka -a -bha. ⁴ -A weng bhē =nE 'ö 'susongga -nu 'wo dhang- -bha, -an 'gügludhe -yaaga -kɔ 'pian do bho -a 'ka dhang- 'gü 'ö- =züē' sia-. 'Yö dɔ dhebo 'ö koyiga =yaa- 'kun bhē -a 'dhiö, kö =ya kē =nE =ya 'bē bho 'yaan- -a -bha 'nē =yɔɔ'-, ⁵ 'Ö dhebo 'ö bhē 'yö 'nē gɔɔŋ- do kpɔ. Yö =nE 'yö dho 'dhiö -sü 'sEgüme -nu 'plE 'ka -piö 'gblɔɔŋgblɔŋ do 'ka. 'KEE 'nē bhē -wa -sü 'wo dho -a 'ka -Zlan 'piö -a -bha 'gɔ -gbloo 'sɔɔ. ⁶ Dhebo 'ö bhē -yö =duē, 'ö dho 'yēnng =taa, -dhE 'ö -Zlan -ya -yadhE do -kē -a -bha kö -waan -bhöpē nu -a -dhē -dhEkpaoyi -vuu do ö -ta =plE waa- dhEkpaoyi 'gɔɔ- 'slado -an -bha bhē -a -bha.

⁷ =DhE =ya kē 'dhö, 'ö 'ko do -yö =luu dhang- 'gü. Miselö 'ö -Zlan -bha bɔmE -nu -gɔmE do 'ka bhē 'dhö -Zlan -bha bɔmE -nu mE 'wo- -kɔ =löö, waa- 'gina 'dhö, ö -bha bɔmE -nu 'dhö, 'wo 'ko -ya 'kuē. ⁸ 'KEE -wo -to -a 'gbee- 'ka 'gina -ta 'ö -yadhE yaa kē -dhö yö 'dhö waa- ö -bha bɔmE -nu

'dhö -an -gɔ kö -waan 'to dhang- 'gü gbɔ. ⁹ 'Gina -ziizē 'ö bhē, 'wo- -zuö plaan. Yö =nɛ 'ö tɔɔ =mɛɛ zii, 'ö 'wo- -dhe zlöö dü 'iin Satan 'yö 'kpongtaamɛ -nu 'plɛ -püö -na =nɛ. 'Ö yö 'dhö waa- ö -bha bɔmɛ -nu 'dhö, 'wo -an -zuö 'kpongtaa.

¹⁰ 'Go mü 'a 'we -wo do 'gbee- 'ö go dhang- 'gü =zian' -a ma 'ö- pö: «Dha -sü, 'piigbeedhe waa- -gludēdhe kē -sü 'ö kwa -bha -Zlan -bha 'ka waa- -wogbiindhe 'ö- -bha Klito -bha 'ka =wa yö -dhepuudhe 'gü. Bhii mɛ 'ö za -lo -na kwa dhegluzē -nu tuö -Zlan wö 'dhiö gbeng waa- lēngg bhē, =waa- kē, =waa- =zong' =ya 'go dhang- 'gü. ¹¹ Dɔ 'ö 'bhlanē fɛi -ya wo -an -gban -gɔ waa- 'wun gia- 'ö bhē -a -blɛɛ'- 'wo- wo bhē =nɛ 'ö kwa dhegluzē -nu -wo bɔ -a -ta 'wo to -a 'gbee- 'ka bhē. -Wo wo -kwaa wo -de -wun -zü 'ö 'wo -an zē -a -wun 'gü. ¹² -Dhe -kē 'dhö, dhang- 'gü -dhe -nu, -ka =zuögludhi kē, mɛ -nu -de 'pö 'ka dhang- -nu bhē -an 'gü, -ka =zuögludhi kē! 'Kɛɛ -mē 'yena -wun 'ö dho kē 'kpongtaadhe waa- 'yooga -an -bha 'ka =nɛ -oo! Bhii 'ö tɔɔ dü 'yö =yɔɔ ka 'piö bhē, -yö pa -sü 'ka -naazuēdhe 'ka ka buēndhö 'ö tɔɔ -ya =dua' =nɛ 'töng 'yö- -gɔ bhē =ya 'to 'tee.»

¹³ =Dhe 'ö 'gina =yaa- dɔa =nɛ 'ya -zuö 'kpongtaa 'ö yö -ziö dhebɔ 'ö 'nēgɔɔnzē kpɔ bhē -a 'piö -sü 'gü. ¹⁴ 'Yö pē 'yö -kē =nɛ 'gblübhaa gban =plɛ 'dhö 'wo- nu dhebɔ bhē -a -dhē kö -yaan -lö -yaan 'dho ö -yadhe -bha 'yēngg =taa -bin -sü 'ka =mɛɛ -bha -glu -da -a -ta -sü -gɔ; -dhe bhē =nɛ 'wo dho -bhöpē nu -a -dhē -a -bha, -kwɛ -yaaga waa- ö 'gbu 'piö. ¹⁵ 'Yö =mɛɛ -yö ö 'dhi -po 'ö 'yi 'ö -ziö =nɛ 'yiga 'dhö -yö -ziö dhebɔ 'ö bhē -a 'piö, -yö kē 'dhö kö 'yi -zuö =va -yö ziö -a 'ka. ¹⁶ 'Kɛɛ 'sɛ -yö -nu dhebɔ bhē -a -dhē. Bhii 'sɛ -yö ö 'dhi -po 'ö 'yi 'ö go 'gina dhiö bhē, 'ö- =yɔɔ. ¹⁷ 'Ö- -wun -yö -na 'gina bhē -a -zuē dhebɔ bhē -a buēndhö. 'Yö dho 'ö 'ko -ya dhebɔ bhē -a =suu'- -ta -nu,

mE -nu 'töüdhö 'wo -Zlan -bha tɔŋ =bhlē -ya, mE -nu 'ö
 'wo dɔ -sü 'ka Yesu -wun -dhe 'wun gia- -sü 'gü -an -bha.
 18 'Ö 'gina -yö dho 'ö dɔ 'yoo 'kpong 'dhiö.

13

'Wun 'ö -gban wü =plE -bha

¹ 'Go mü 'a wü do yö kö -yö 'go -na 'yoo =bhaa. -A -sö -yö
 -kē 'gɔɔ- do, 'ö- -gɔ -nu 'dhö 'slaplE; 'ö 'gɔ =gblaa' 'dho -a
 -sö 'ö -dhö do do 'ka -a -bha. 'Ö 'tɔ do 'ö 'si -bho -Zlan -gɔ
 -tɔ 'ka 'yö -ya -sü 'ka -a -gɔ -nu -bha. ² Wü 'ö bhē -yö -bhɔ
 'gɔɔ- -bha. -A -gɛn -nu -wo -kē =nE -tɔn -bha gbɛn- -nu
 -gɛn 'dhö, 'ö- dhiö -dhe -yö -kē =nE =laa' dhiö -dhe 'dhö.
 'Yö 'gina do 'ö =sia bhē 'yö ö -bha 'piigbeedhe 'dhö, ö -bha
 'gɔ -gbloo waa- ö -bha -kɔ -mɔ 'wuën- -sü =va bhē 'ö- nu
 -a -dhē. ³ 'Kpa do =va 'gblüünzē -yö -kē wü bhē -a -gɔ -nu
 do -bha. ME 'ö 'yan =ya -da -a -ta kö =ya kē -a 'yaan =nE
 bhüö 'ö- 'kpa 'dhö bhē, pē 'ö wü 'ö bhē 'ö dho to =a -kwaal
 -bezē yö -mü. 'KEE wü bhē bhüö 'ö dho kē -a ga -gɛn 'ka
 -be bhē, -yö -dha -a -gɔ. 'Ö 'kpongtaame -nu 'saadhö 'wo
 -da =zuögludhi 'gü, 'wo -ziö wü 'ö bhē -a 'piö. ⁴ 'Ö mE -nu
 'saadhö 'wo yö 'gina 'ö bhē -a gba -sü -bha, bhii 'ö tɔɔ -yö
 ö -bha -kɔ -mɔ 'wuën- -sü -nu wü 'ö bhē -a -dhē. 'Ö 'wo
 yö wü 'ö bhē -a gba -sü -bha 'pö -a pö -sü 'ka =nEE: «Dö 'yö
 dho kē =nE wü 'ö =nE -a 'dhö e? Dö 'ö dho -mɔ -a -bha kö
 -yaan 'ko zē -a 'ka E?»

⁵ 'Ö wü bhē 'wo zian nu -a -dhē, 'yö -de -sü =va -wun
 -nu =blE, 'ö 'si -nu bho -Zlan -gɔ; 'ö -kɔ -mɔ 'wuën- -sü
 yö kö pē -nu 'wo =nE -yaan -an kē 'su 'gɔɔ- -yiisiē ö ga
 =plE 'piö. ⁶ 'Ö yö 'si -bho -Zlan -gɔ -sü 'gü, -a 'tɔ -gɔ 'gü
 zē -sü 'ka, 'wun -nu -dɔ yö 'dhö, -dhe 'ö- -bha waa- mE
 -nu 'wo dhang- 'gü 'töüdhö -an -bha -sü 'ka. ⁷ 'Ö zian -yö
 nu -a -dhē, kö -yaan -glu gɔn -Zlan -bha mE -nu 'slöösLö
 'ka -yaan 'to -a 'gbee- 'ka -an -ta; 'yö -kɔ -mɔ 'wuën- -sü

yö 'gunng 'saadhö, 'sɛgümɛ -nu 'saadhö waa- -wo =suu'-
'saadhö -a pö -mɛ -nu -ta. ⁸'Kpongtaamɛ -nu 'saadhö -wo
-dho -a gba; 'kɛɛ mɛ -nu 'wo dho -a gba 'wo tɔɔ mɛ -nu 'ö
'kpongtaadhɛ züdɔyi 'ka, 'ö -an 'tɔ yaa -ya -sü 'ka 'bhlanë
'wo- zë bhë -a -bha =toëpö -këdhösü 'sëedhɛ -be bhë -a 'gü
bhë.

⁹-Ka ka 'to 'to -së 'ka! Mɛ 'ö- 'wun ma -to 'dhö -dhö, -yö
'wun 'ö =nɛ -a ma. ¹⁰Mɛ -nu 'wo -Zlan -bha 'sɛgɔgümɛ
-nu 'ka bhë, -a mɛ -nu 'wo dho kë -kanso 'kɔɔmɛ 'ka, -wo
-dho dho -an 'ka -kanso 'kɔɔdhö. 'Ö- mɛ -nu 'wo dho kë
'pö -zë -dhaa 'ka -mɛ 'ka, 'wo dho -an zë -dhaa 'ka. -A
-wun 'gü, -yö -Zlan -bha mɛ 'slööslö -bha kö -wo bɔ 'wun
'gbee- 'gü, =zuö' -kë -saa -sü waa- -zo yö -sü -an 'ka.

¹¹'Go mü 'zü, 'ö wü 'waa gbɛ 'ö- -sö -yö -kë =nɛ 'bhlanë
-nu -sö 'dhö, 'ö- 'we -wo -yö -kë -ziizë =nɛ 'gina -wo 'dhö
bhë, 'a- yö kö -yö 'go -na 'sɛidhö, ¹²'Ö wü -blɛɛzë -bha -kɔ
-mɔ 'wuën- -sü 'gü -pë -nu -kë -a wö 'dhiö mü. 'Ö 'sɛ waa-
ö 'gü -mɛ -nu 'gbee- -ta bho -yö kë 'dhö kö wü -blɛɛzë 'ö-
-bha bhüö 'ö dho to -a =kwaa' -be 'ö bo bhë, -waan -a gba.
¹³Wü kë =plɛ -naa 'ö bhë, -yö -dhidhaapë =vava -nu -kë;
-a do 'bhaa tɔɔ -ya -kë 'ö 'siö -yö go dhang- 'gü 'yö =yɔɔ
'kpongtaamɛ 'plɛ wö 'dhiö. ¹⁴'Ö 'kpongtaamɛ -nu 'plɛ
-püö, -kɔ -mɔ 'wuën- -sü 'ö -dhidhaapë -nu kë -na -a 'ka
bhë -a =kwaa' wü -blɛɛzë bhë -a wö 'dhiö. Bhii pë -nu bhë
=nɛ 'wo- -wo -kë 'gbiin- 'kpongtaamɛ -nu wö 'dhiö, 'ö bɔ
-a -ta 'ö- pö -an -dhë, wü 'ö yaa ga gbɔ -gi 'ö- wo -a =kwaa'
bhë, -wa 'bin =va do dɔ. ¹⁵Wü kë =plɛ -naa 'ö bhë -yö zian
-yö kö -yaan -këdhösü nii -da wü -blɛɛzë 'bin bhë -a 'gü,
-yö kë 'dhö kö pë 'bin 'ö bhë -yö 'we 'iin kö mɛ -nu 'saadhö
'ö waa 'dho we -a -bha kö -waan -a gba, -yö -an zë. ¹⁶Wü 'ö
bhë -yö -dhö mɛ -nu 'saadhö, -yö 'në 'tee 'ka 'iin -yö mɛ
=va 'ka, -yö =bhɔɔmɛ 'ka 'iin -yö 'fɛɛmɛ 'ka, -yö 'gan 'ka
'iin 'yaa 'gan 'ka, -an 'plɛ 'gbee- -ta -bho kö mɛ 'ö -dhö

-wo =duakëpë do kë -a kwεε 'gü -kɔ -bha 'iin -a -kpong 'gü. ¹⁷ Mε gbε yaa kë -dhö kö -yaan pë 'dhɔ 'iin pë 'dhɔɔ do, kö =duakëpë 'ö bhë yaa kë -a -bha. =Duakëpë 'ö bhë 'ö tɔɔ: Wü 'ö bhë -a 'tɔ 'iin 'nimlo 'ö nu -sü 'ka 'ö waa- wü 'ö bhë 'ö -an 'tɔ dhö dho 'ko 'piö.

¹⁸ -Dhε 'ö =nε 'ö tɔɔ 'kpaakpadhε -zɔn -dhε. Mε 'ö 'wun -bho 'kou do, 'nimlo 'ö =nε -ya -dho 'kuë- -sü =dhong'- bhii 'nimlo 'ö bhë waa- gɔɔn- do 'tɔ -wo -dho 'ko 'piö. -A -dho 'kuë- -sü 'ö tɔɔ -këng' 'slado -kɔ 'slado ö ga 'slado (666).

14

'Bhlanë waa- mε -nu 'ö -an -dhɔ

¹ =Dhε =ya kë 'pö 'a -dhε -ga; 'a 'bhlanë yö kö -yö do -sü 'ka Siɔn -tɔn tuö. Mε -lü -vuu =këng' do ö -kɔ -yiisië waa- mε -lü -vuu -yiisië (144.000) -wo kë -a 'piö mü. -A 'tɔ waa- -a Dë 'tɔ -wo -kë -ya -sü 'ka -an -kpong 'gü. ² 'Ö -wo do -yö go dhang- 'gü 'ö -we =nε 'yi =va -zuö 'iin dha 'we -drinng 'dhö, 'a- ma. 'We -wo 'a- ma bhë -yö -bhɔ kɔngzëmε -nu -bha kɔng -wo -bha. ³ Mε -lü -vuu =plëzë 'wo bhë -wo -kë do -sü 'ka 'gɔ -gbloo bhë 'dhö, pë 'bhee- -yiisië waa- mε ziizii -nu 'wo bhë -an wö 'dhiö 'ö 'wo yö 'tan -dëü bho -sü 'gü. Mε gbε yaa kë -dhö kö -yaan 'tan -dëü bhë -a =daan'- -yaan -a bho -a 'ke yaa kë mε -lü -vuu =këng' do ö -kɔ -yiisië waa- mε -lü -vuu -yiisië 'ö Yesu -yö -an -gɔ -ta -bɔ =sɔɔn yaa -gɔ 'kpongtaa bhë -an 'ka. ⁴ Mε 'wo bhë waa wo -de kë -dhuuzë dhoo -nu 'piö, -wo wo -zo -kë wo -de 'piö 'wo to 'slööslö. -Dhε 'saadhö 'ö 'bhlanë bhë 'ö dho -a -bha, -wo -ziö -a 'piö. -Wo -an -dhɔ mε -nu ziën kö -waan kë mε -nu 'wo dho dho -an 'ka -Zlan waa- 'bhlanë -an 'dhiö -a 'ka. ⁵ Waa- ma -an 'dhii do kö -wo =sua -wun =blεε' -na; 'wun yaa gbε 'yaa -an -bha.

'Wun 'ö -gban -Zlan -bha bɔmε -nu -yaaga -bha

⁶ 'Go mü 'a -Zlan -bha bɔmɛ do 'waa gbɛ yö kö -yö ziö -sü 'gü plaan 'puu 'piö dhuö =gbiin. =Toëpö -këdhö'sü -wuntaɔsɛ -yö -kë -a -gɔ kö -yaan nuë mɛ -nu 'wo 'kpongtaa 'ö 'wo 'sɛ 'saadhö 'gü -mɛ -nu 'ka, 'gunng 'saadhö 'gü -mɛ -nu 'ka, -wo =suu'- 'saadhö pö -mɛ -nu waa- 'sɛgɔ 'saadhö 'gü -mɛ -nu -an -dhë. ⁷ -Yö -kë -a pö -dhiadhö -wo 'gbee- 'ka =nɛɛ: «-Ka 'suö -Zlan -dhë, 'ka- 'tɔ bhɔ! Bhii 'töng 'yö dho mɛ -nu -bha za kaan bhë =ya -lo. Yö 'ö dhang-, 'sɛ, 'yoo waa- 'yigɔ -an 'plɛ -kë bhë, -kaa gba!»

⁸ =Dhɛ go mü, 'ö -Zlan -bha bɔmɛ kë =plɛ -naa -yö nu -a pö -sü 'ka =nɛɛ: «Babilɔnë -pö =va bhë =ya =siö'-, -ka -dhɛ -ga, =ya =siö'-! =Ya =sɔɔn kë -sü -pɛn 'sɛ 'saadhö 'gü =nɛ -kɔ 'ö 'wo -drɔɔn 'yi nu -na -a 'ka mɛ 'plɛ -dhë =waa- mü 'ö -an kë -na bhë -a 'dhö!»

⁹ 'Ö -Zlan -bha bɔmɛ kë -yaaga -naa -yö -wo kö -a mɛ =plɛ 'wo 'dhiö bhë =wa ziö. -Yö -kë -a pö -sü 'gü -wo 'gbee- 'ka =nɛɛ: «Mɛ 'ö 'dhoë- wü bhë -a gba -yaan -a 'bin gba, 'go mü -waan =duakëpë -ya -a -kpong 'iin -a -kɔ -bha, ¹⁰ yö -de 'pö, -Zlan -bha -naadhe -dhö nu -a -ta. -Zlan -bha -naazuëdhe bhë -yö -kë =nɛ -drɔɔn 'yi 'ö 'yaa -kaan 'kuë -sü 'ka 'ö yö gia- 'ö- -lo ö -bha -naazuëpë 'ka, yö -mü. Mɛ 'oo mɛ 'yö 'dhoë- -a kë =nɛ -kɔ bhë -a 'dhö, -wo -dho -a -zuö blɔɔn 'tëë yaazë bhë -a 'siö 'gü, 'go mü 'ö- 'yënnng dho bhɔ -Zlan -bha bɔmɛ -nu 'slööslö waa- 'bhlanë -an wö 'dhiö. ¹¹ 'Siö 'tëë 'yö dho -an 'yënnng bhɔ bhë, -yö -dho kë -dhö =toëpö =toëpö 'ka. Mɛ -nu 'wo 'dhoë- wü bhë waa- -a 'bin -an gba, 'iin 'ö- -bha =duakëpë 'dhoë- kë -an -bha, 'tɛɛpadhe yaa 'dho kë -an -gɔ lënnng -nu waa- gbeng -nu -an 'ka.»

¹² =Dhɛ 'ö =nɛ 'ö tɔɔ -Zlan -bha mɛ -nu 'slööslö 'wo 'dhoë- -a -bha tɔng kun 'go mü -waan wo -zo yö Yesu -bha, -an -bɔ 'wun 'gbee- 'gü -dhɛ 'ö dho kë =zuösaadhɛ 'ka.

¹³ 'Go mü 'ö -wo do -yö bɔ dhang- 'gü 'ö- pö n -dhë: «'Sëédhɛ 'sü 'ü pë =bɛɛn'- -a 'gü =nɛɛ: 'Go =dɛɛ -bha, =zuögludhi -yö kë mɛ -nu 'wo 'dhoë- to -klu -sü 'ka Dëmɛ -bha -yaan yöë -an -bha ga -sü -bha -an -gɔ!» 'Ö -Zuu 'slööslö -ya -pö: «-Yö 'wun gia- 'ka, -wo -dho wo 'tɛɛ pa wo -bha yuö 'gbee- kë -sü -gɔ bhii -an -bha 'wun -së kë -sü =saan' -dho bho 'ma.»

'Sɛ -ta dhuö -pë 'kan -sü

¹⁴ =Dhɛ 'a- ga 'zü, 'ö 'a dha kpö 'puu do yö; 'ö pë 'ö -kë =nɛ mɛ -lü 'dhö 'a- yö kö -yö -ya -sü 'ka -a -ta. 'Sënnɔ 'gɔ =gblaa' do -yö -kë -a -gɔ -bha, 'ö 'gbuë- 'kan -dhaa do 'dhiözë 'dho -a kwɛɛ. ¹⁵ 'Yö -Zlan -bha bɔmɛ do 'bhaa -yö go -Zlan -gba -a 'gü -kɔ 'gü 'yö yö plaan, 'yö yö 'wun =blɛɛ' -sü -bha -wo 'gbee- 'ka mɛ 'yö -kë -ya -sü 'ka dha kpö -ta bhë -a -dhë 'ö- pö: «-Bhö ü -bha -dhaa 'në 'sü, 'ö mɛ -nu 'wo 'kpongtaa, 'ü -an 'dho 'kuë- =nɛ =dhɛ 'wo -mlü -kan bhii -mlü =ya ga. -A 'kan -yi =ya -lo.» ¹⁶ =Dhɛ =ya kë 'pö 'ö mɛ 'ö -kë -ya -sü 'ka dha kpö -ta bhë 'yö nu ö -bha -dhaa 'në 'ka, -yö yö yuö kë -sü -bha =nɛ mɛ -mlü -kan, 'ö- 'plɛ -kan.

¹⁷ 'Ö -Zlan -bha bɔmɛ 'bhaa 'ö yö -de 'pö ö -dhaa 'në do 'dhiözë 'dho -a kwɛɛ -yö go -Zlan -gba -a 'gü -kɔ 'ö dhang- 'gü bhë -a 'gü 'yö yö plaan.

¹⁸ 'Ö -Zlan -bha bɔmɛ do 'waa gbɛ 'ö -kɔ -mɔ 'wuën- -sü 'dhoë- -gɔ 'siö -ta bhë, -yö go slabhodhɛ -bha =zian', 'yö nu 'yö- pö -wo 'gbee- 'ka mɛ 'ö -dhaa 'dhiözë 'dhoë- -gɔ bhë -a -dhë =nɛɛ: «-Bhö ü -bha -dhaa 'sü 'ü lɛzɛn -nu 'wo 'sɛ -ta 'ü -an -kpa 'kan -a 'ka, bhii -an -kpa -nu =wa ma.» ¹⁹ 'Ö -Zlan -bha bɔmɛ bhë 'yö ö -bha -dhaa bɔ 'sɛ -ta lɛzɛn -lü -nu tuö -an -kpa 'kan -sü 'ka, 'yö -an -zuö lɛzɛn -kpa 'yi -bho -a 'gü -pë 'gü. -Drɔɔn 'yi -bho -a 'gü -pë 'ö bhë 'ö tɔɔ -Zlan -bha -naazuédhe =va. ²⁰ -Wo lɛzɛn

-kpa -nu bhë -an =wüü -an 'yi -bho -a 'gü -pë 'gü pö -=taa
-bha, 'ö fëi -glu -yö ziö 'yö dho 'kilong =këng' -yaaga -naa
=taa 'ö- -glu =duan' -yö -mɔ 'mɛtrë do waa- ö 'gbu -bha.

15

-Zlan -bha bɔmɛ -nu 'slaplɛ -bha -nu -Zlan -bha
-naazuëdhe -kɔɔ -nu 'ka -sü

¹ 'Yö =dhɛ 'a- -ga 'zü, 'ö pë do 'bhaa 'ö 'wun 'gblüünzë
=va 'ka, 'a- yö dhang- 'gü. -Zlan -bha bɔmɛ -nu 'slaplɛ =nɛ
'a -an yö kö -wɔ mɛ -ta -wun 'slaplɛ -wo -an kwɛɛ. -Wɔ
mɛ -ta -wun 'slaplɛ 'wo bhë 'wo tɔɔ -an -kaanta -nu 'ö
-Zlan dho ö bha -naazuëdhe 'dhiö -mɔ -a 'ka 'kuë.

² 'A ko 'zü 'a pë 'ö -kë =nɛ 'yipuë 'dhö 'a- yö. 'Kɛɛ 'yi
giagia 'yaa -mü. -Yö -kë =nɛ pë 'wo 'vɛdhɛ kë -na -a 'ka 'ö
mɛ 'yan 'dho bɔ -na -a 'gü bhë -a 'dhö. 'Yö pë 'ö -kë =nɛ
'siö 'dhö 'a- yö kö -yö -ya -sü 'ka -a 'gü. 'Go mü 'zü 'a mɛ
-nu 'wo to -a 'gbee- 'ka wü bhë 'dhö, -a 'bin 'dhö, waa- mɛ
'ö- 'tɔ 'dho 'nimlo 'ka bhë -an -ta bhë, -an yö kö -wo dɔ -sü
'ka pë 'bhlöngbhlöng bhë -a 'dhiö, kö -Zlan =ya kɔng -nu
nu -an -dhë. ³ -Wo -kë Moizö 'ö -kë -Zlan -bha yuökëmɛ
'ka bhë -a -bha 'tan 'ö- bho -Zlan 'tɔ bhɔ -sü 'ka waa- 'tan
'ö bho 'bhlanë 'tɔ bhɔ -sü 'ka bhë -an bho =dhia, -a pö -sü
'ka =nɛɛ: «Yi Dëmɛ, -Zlan 'piigbeeze, ü këyuö -nu =wo =va,
'ö 'wo 'gblüünzë; 'sɛ 'saadhö -bha -gludë, ü -bha 'slë -nu
=wo kpengdhö 'ö 'wo 'wun gia- 'ka. ⁴ Dö 'ö yaa 'dho suö ü
-dhë -ɛ, yi Dëmɛ? Dö 'ö yaa 'dho we -a -bha kö -yaan ü 'tɔ
bhɔ =ɛ? Bhii bhi do =nɛ 'ü 'slööslo. 'Setamɛ -nu 'saadhö
-wo -dho nu 'wo -gblü ü 'dhiö ü gba -sü 'ka, bhii ü këwun
-nu 'wo kpengdhö bhë =wa yö -dhɛgbɛadhɛ 'gü.»

⁵ =Dhɛ 'ö pë -nu 'wo bhë =wa ziö, -Zlan -gba -a 'gü -kɔ 'ö
dhang- 'gü bhë, 'a- yö kö -a 'dhi =ya 'po -dhɛ 'slööslo -dhɛ
=duö 'ö -Zlan 'dhö -ya -sü 'ka -a 'gü bhë -a -zü. ⁶ -Zlan -bha
bɔmɛ -nu 'slaplɛ 'ö -wɔ mɛ -ta -wun 'slaplɛ 'dhö -an -gɔ

bhë, -wo -go -Zlan -gba -a 'gü -kɔ 'gü, 'wo yö plaan; -wo -kë 'dhu -sü 'ka sɔ 'puu 'ö 'bhü -sü 'ka -a 'ka; 'ö 'sënnng -du kwi 'dho ziö -sü 'ka -an -kënnng 'gü. ⁷ 'Ö pë 'bhee- -nu -yiisië 'wo bhë 'ö- mɛ do -yö 'sënnng -kɔɔ 'slaplɛ 'ö 'wo pa -sü 'ka -Zlan 'ö 'bhee- =toëpö 'ka bhë -a -bha -naazuëdhe 'gü -pë 'ka bhë -a nu -Zlan -bha bɔmɛ -nu 'slaplɛ 'wo bhë -an -dhë. ⁸ -Zlan -gba -a 'gü -kɔ bhë -yö -pa 'siɔn 'ka -Zlan -bha 'tɔbhɔdhe waa- -a -bha 'piigbeedhɛ -an -kwaaw'. 'Ö mɛ gbɛ yaa kë -dhö -yaan -da -Zlan -gba -a 'gü -kɔ 'ö bhë -a 'gü kö -yö 'dho -yö yöë -wɔ mɛ -ta -wun 'slaplɛ 'ö -Zlan -bha bɔmɛ -nu -wo -nu -a 'ka bhë -a -wun 'plɛ -yö 'ko 'dhiö -yi -bha.

16

'Wun 'ö -Zlan -bha -naazuëdhe -kɔɔ -nu 'slaplɛ 'gü

¹ 'Go mü 'zü, 'ö -wo do 'gbee- 'ö go -Zlan -gba -a 'gü -kɔ 'gü =zian' 'a- ma; 'ö- pö -Zlan -bha bɔmɛ -nu 'slaplɛ 'wo bhë -an -dhë: «-Ka 'dho 'ka -Zlan -bha -naazuëdhe -kɔɔ pa -sü 'slaplɛ bhë -a 'daawo 'kpongtaa!»

² 'Ö -Zlan -bha bɔmɛ -blɛɛzë -yö dho 'yö ö bha -kɔɔ pa -sü 'daawo 'kpongtaa. 'Ö mɛ 'yënnng bhɔ bhüö =yua' -yö -lo mɛ -nu 'ö wü 'ö bhë 'ö- =dua' 'dho -an -bha, 'go mü 'wo- 'bin gba bhë -an -bha.

³ 'Ö -Zlan -bha bɔmɛ =plɛ -naa -yö ö -bha -kɔɔ pa -sü 'daawo 'yoo -bhaa. 'Ö 'yi -yö -kë =nɛ mɛ =ya ga -a fɛi 'dhö, 'ö pë -nu 'wo 'bhee- 'yoo =bhaa, 'ö -an 'plɛ -wo ga.

⁴ 'Ö -Zlan -bha bɔmɛ kë -yaaga -naa -yö ö -bha -kɔɔ pa -sü 'daawo 'yiga -nu waa- 'yigɔ bhɔ -dhɛ -nu -an =bhaa -dhɛ -nu -bha; 'ö 'yi -nu -wo -gla fɛi 'gü. ⁵ 'Ö -Zlan -bha bɔmɛ 'ö -wo -kɔ -mɔ 'wuën- -sü 'dho -a -gɔ 'yi -nu -ta bhë 'a- -wo ma =nɛɛ: «Bhi 'ü 'slööslö, bhi 'ü -dhö, 'ü -kë -dhö, ü kpengdhö ü -bha za 'kan -kɔ -nu 'gü. ⁶ Bhi mɛ -nu 'wo ü -bha mɛ -nu 'slööslö waa- ü 'dhiwöpö mɛ -nu fɛi -lo bhë,

ü fEi 'yi nu -an -dhë 'wo- mü; -yö -dhi -an -bha.» ⁷ 'Go mü 'zü, 'ö -wo do 'bhaa -yö go -Zlan -bha slabhodhE -bha 'a-ma =nE: «=li-, 'wun gia- -mü, yi DëmE -Zlan 'piigbeezë, ü bha za 'kan -kɔ -nu 'plE =wo -së 'ö 'wo kpengdhö giagia 'ka!»

⁸ 'Ö -Zlan -bha bɔmE kë -yiisië -naa -yö ö bha -kɔɔ pa -sü 'daawo lan- -ta 'ö 'wo zian nu -a -dhë kö -yaan mE -nu 'güö 'siö 'ka. ⁹ 'Ö mE 'bhee- -nu -wo yö 'güö -sü 'gü 'siö -bha dɔdhe 'gbee- =kwaa'; 'wo yö 'si -bho -Zlan 'ö -kɔ -mɔ 'wuën- -sü 'dhoë- -gɔ -wɔ mE -ta -wun =suu'- 'ö bhë -a -ta bhë, -a 'tɔ -gɔ -sü 'gü; waa 'go =zian' wo -bha 'wun yaa 'gü kö -waan -a 'tɔ bhɔ.

¹⁰ 'Ö -Zlan -bha bɔmE kë 'sɔɔdhu -naa -yö ö -bha -kɔɔ pa -sü 'daawo wü 'ö bhë -a -bha 'gɔ -gbloo 'gü, 'ö -dhE 'saadhö 'ö- -bha -gludëdhëkëdhE 'dhoë- -bha 'yö -da -dhetiidhE 'gü, 'ö mE -nu -wo yö wo nE- -bhö -sü 'gü 'yënnghɔdhe =kwaa'. ¹¹ 'Wo yö 'si bho -sü 'gü -Zlan 'ö dhang- 'gü -a -gɔ, wo -bha 'yënnghɔdhe waa- wo -bha bhüö -nu -wun 'gü; waa 'go wo -bha 'wun yaa -nu 'gü.

¹² 'Ö -Zlan -bha bɔmE kë 'slado -naa -yö ö -bha -kɔɔ pa -sü 'daawo 'yiga =va 'wo- -dhE öflatö bhë -a =bhaa. 'Ö 'yiga =va bhë 'ö =bhöü kö -yaan zian nu -gludë 'ö go lan- bhɔ =zian' bhë -a -dhë. ¹³ 'Go mü 'a -zuu yaa -yaaga 'wo bhɔ 'drɔɔ -bha -an yö: -A do -yö -go 'gina dhiö, 'ö- do 'bhaa -yö go wü dhiö, 'ö- -kaanta -yö go -Zlan -wodhiöloomE =suazë dhiö. ¹⁴ Wo =nE 'wo tɔɔ dü -bha -zuu yaa -nu 'wo -dhidhaapë -nu -kë. -Zuu -yaaga 'wo bhë =nE 'wo dho -gludë -nu 'piö 'kpongtaadhE 'saadhö -bha, kö -waan -an 'kpɔ 'kuë- kö -glu 'ö dho kë -Zlan 'piigbeezë -bha yi =va 'ka bhë -waan gɔn.

¹⁵ -Ka ka 'to 'to, a nu -na =nE =kwaanmE -yö nu. 'Gludhi -yö kë mE 'ö 'dhoë- -ya ö 'yaan -yaan ö -bha sɔ -nu 'kun

-së -a -gɔ, -yö kē 'dhö kö =kun 'yö dho to ö 'kpaan 'ka 'ö mɛ -nu dho -a lē- -dhe yö.

¹⁶ -Zuu -nu bhē -wo -gludē -nu -kpɔ 'kuē- -dhe do 'wo- -dhe Eblö -nu -wo 'gü Aamedon -a -bha.

¹⁷ 'Ö -Zlan -bha bɔmɛ kē 'slaplɛ -naa -yö ö -bha -kɔɔ pa -sü -pɛn 'dhung- -ta. 'Ö -wo do 'gbee- -yö -we -Zlan -gba -a 'gü -kɔ 'gü; -yö -go 'gɔ -gbloo 'gü 'yö- pö: «=Ya yän!» ¹⁸ 'Ö pē -bha 'yanbɔdhe -nu, pē -drinng -nu, dha 'we -wo -nu waa- 'sɛ -bha =zluun -sü 'gbee- -wo -kē. 'Ö sü mɛ 'bhee- -da -sü -bha 'kpongtaa 'sɛ yaa =zluun =suu'- wo 'dhö do; -a mɛ 'ö =nɛ -yö -kē 'gbee- =duö! ¹⁹ 'Ö 'kwipö ('wo- -dhe Babilönē) bhē 'yö -kan 'gü -yaaga, 'ö pödhɛ -nu 'wo 'sɛgüdhe 'saadhö -nu -bha 'ö -an -bha 'kɔ -nu -wo -lo. -Zlan -zo -yö -bhüö Babilönē -dhe =va 'ka kö -yaan ö bha -naazuédhe =va -drɔɔn -kɔɔ nu -a -dhē -yaan -a mü. ²⁰ 'Ö 'yi songdhe -nu -wo =dhɔng, 'ö -tɔn -nu -wo =dhɔng mɛ -gɔ. ²¹ Mëngga =vava 'ö- do dho -mɔ 'kilong 'gɔɔ- -yiisiē -bha bhē 'wo go dhang- 'gü 'wo -lo mɛ -nu -ta. 'Ö mɛ -nu -wo yö 'si -bho -Zlan -gɔ -sü 'gü mëngga -nu 'wo -lo -an -ta 'wun -wɔ mɛ -ta dhe 'ka bhē -a -wun 'gü. Bhii 'ö tɔɔ -yö -kē 'gbee- -ziizē 'ka.

17

¹ =Dhe =ya kē 'pö 'ö -Zlan -bha bɔmɛ -nu 'slaplɛ 'ö -kɔɔ pa -sü 'slaplɛ -yö -kē -an -gɔ bhē, 'ö- mɛ do -yö nu 'ö- pö n -dhē: «-Bhö nu kö -kɔ 'a dho =sɔɔnkédhe =va 'ö pö- =va 'ö dɔ -sü 'ka 'yiga =plëézē 'sɔɔ -a 'klo- bhɔ -a 'ka bhē 'aan- -zɔn ü -dhē. ² 'Kpongtaa -gludē -nu =wa wo -de kē -dhuuzē -a 'piö, 'go mü 'ö 'kpongtaamɛ -nu =waa- -bha =sɔɔn kē -sü -drɔɔn mü, -a 'yi =ya ziö -an -gɔ.»

³ 'Ö -Zlan -bha bɔmɛ -yö dho n 'ka 'yënnng =taa -Zuu 'slööslö =kwaa'. -Dhe bhē =nɛ 'a dheɔ do yö -a -bha kö -yö -ya -sü 'ka wü nuɛazē 'ö 'si -bho -Zlan -gɔ -tɔ -nu 'dho

-lo -sü 'ka -a -bha -a -taa. Wü 'ö 'dhö bhë -a -gɔ -nu -wo 'slaplɛ 'ö- -sö -nu 'dho 'gɔɔ- do. ⁴ Dhebo 'ö bhë, so bun nuɛazë -yö -kë -a -bha; 'ö- 'bhaa -nu -wo -kë 'sënnɔ 'ka, 'ö- 'bhaa -nu -wo -kë -guö 'yan bho -sü -zë -nu 'ka, -zɔɔ -nu -wo -kë -a -bha. 'Sënnɔ -kɔɔ do 'ö -kë pa -sü 'ka pë =lɔɔzë -nu, pë -dhuuzë -nu 'wo- -bha =sɔɔn kë -sü 'piö -pë -nu 'ka -yö -kë -a kwɛɛ. ⁵ 'Ö 'tɔ do 'ö- -gɛn 'dho -bin -sü 'ka 'yö -kë -ya -sü 'ka -a -kpong 'gü =nɛɛ: Babilɔnë, 'kwipö =va, =sɔɔnkëdhe -nu waa- pë =lɔɔzë -nu 'wo 'kpongtaa -an dhe. ⁶ Dhebo 'ö mɛ 'slööslö -nu waa- Yesu -bha =goo- -nu fɛi mü bhë, a- -yö kö fɛi bhë -ya kë -na =nɛ -kɔ 'ö yɔ 'yi 'dhö mɛ kë -na -a 'ka bhë -a 'dhö.

'Ö 'tetundhe =va -yö -da n 'gü n 'yan -bha -dɔ -a -bha -sü 'ka. ⁷ 'Ö -Zlan -bha bɔmɛ -ya pö n -dhë: «-Më 'yö -kë 'ö ü 'te -yö tun =ii? Dhebo bhë waa- wü 'ö- -gɔ 'dho 'slaplɛ, 'ö- -sö -nu 'dho 'gɔɔ- do, 'ö -ya -sü 'ka -a -taa bhë, a -dho -a -gɛn 'ö -bin -sü 'ka bhë -a pö ü -dhë. ⁸ Wü 'ö bhë -yö -kë 'bhee- 'dhiö -be 'kɛɛ 'yaa 'dhö gbɔ, -yö -dho go -glu 'kpa 'dhi =va 'gü kö -yaan 'dho ö 'gü =siö' -zian 'ka. Mɛ -nu 'wo 'kpongtaa 'ö -an 'tɔ yaa -ya -këdhösü 'sëedhɛ -be 'gü 'kpongtaadhɛ züdüyi 'ka bhë, -an 'te -yö -dho tun -a -bha -go -glu 'kpa 'dhi =va 'gü -sü 'ka -an 'yaan 'ka. Bhii -yö -kë -dhö, 'yaa -dhö gbɔ; 'kɛɛ -yö -dho -wo 'zü.

⁹ -Dhɛ 'ö =nɛ 'ö tɔɔ 'wundɔdhe waa- 'kpaakpadhɛ -an -zɔn -dhɛ. -A -gɔ -nu 'slaplɛ bhë 'wo tɔɔ 'sɛ -tɔn 'slaplɛ 'ö dhebo 'ö bhë 'ö -ya -sü 'ka -an -ta; -wo -gludë 'slaplɛ 'ka 'pö. ¹⁰ -An mɛ 'sɔɔdhu =wa 'go -an ziën; 'waa -dhö gbɔ, -a mɛ do 'tɔ -yö bhɔ -sü 'gü. -A mɛ kë 'slaplɛ -naa yaa nu =kun; =ya kë =nɛ =ya nu, 'töng kpö 'bhle =nɛ 'ö dhoë- kë zö. ¹¹ Wü 'ö 'dhiö -bezë 'ö -kë 'bhee- 'ö 'yaa- 'ka gbɔ bhë, yö gia- 'ö tɔɔ -gludë kë 'slɛaga -naa, yö =nɛ 'ö tɔɔ -gludë 'slaplɛ 'wo bhë -a mɛ do 'ö =ya ö -bha -gludëdhɛ kë 'saadhö, 'yö 'dho -na ö -bha 'gü =siö' -zian 'ka bhë.

¹² -A -sö -nu 'gɔɔ- do 'ü -an yö bhë 'wo tɔɔ -gludë -nu 'gɔɔ- do 'ö waa 'tɔbhɔdhe kë =kun 'kɛɛ -wo -dho -kɔ -mɔ 'wuën- -sü yö wo -bha -gludëdhɛkëdhe -bha kö waa- wü bhë -an 'tɔ -yaan bhɔ 'lɛlɛ do 'piö. ¹³ =Dhe 'wo- -bha 'gɔɔ- do, -an -zo -ta -a 'gü -wun -yö do, 'ö 'wo wo -bha 'piigbeedhe waa- -kɔ -mɔ 'wuën- -sü -lo wü bhë -a kwɛɛ. ¹⁴ -Wo -dho 'ko -ya 'bhlanë -bha, 'kɛɛ 'bhlanë -yö -dho to -a 'gbee- 'ka -an -ta; bhii 'ö tɔɔ -yö dëmɛ -nu -bha Dëmɛ waa- -gludë -nu -bha -gludë 'ka. Yö 'dhö waa- ö bha mɛ -nu, mɛ 'ö -an -dhɔɔ -kë, 'ö -an sü 'wo -to -a 'piö -mɛ -nu 'ka -wo dho to -a 'gbee- 'ka.»

¹⁵ 'Ö -Zlan -bha bɔmɛ -ya pö n -dhë 'zü =nɛɛ: «'Yi -nu 'ü -an yö, 'ö =sɔɔnkëdhe -yö -kë -a -ta bhë 'wo tɔɔ 'sɛgümɛ -nu, mɛ gbung -nu, 'sɛgɔgümɛ -nu, -wo =suu'- 'oo =suu'- pö -mɛ -nu. ¹⁶ -Sö 'gɔɔ- do 'ü -an yö bhë waa- wü -wo -dho =sɔɔnkëdhe 'ö bhë -a -san zë; -wo -dho -a -bha pë -nu 'wo -gɔ -a 'plɛ kun -a -gɔ 'ö 'yö to ö bun 'kpaan 'ka. -Wo -dho -a =nëng -bhö 'ö 'wo- 'gü =siö 'siö 'ka. ¹⁷ Bhii -Zlan -de =nɛ 'ö ö -de -dhi -a -dhë -wun -da -an =zuö' 'gü 'wo- -kë, 'ö 'wo dho wo 'kuë-, 'wo wo -bha -kɔ -mɔ 'wuën- -sü nu wü bhë -a -dhë, -yaan 'dho -yaan yöë -Zlan -wo -nu 'dhiö -mɔ 'kuë -yi -bha.

¹⁸ -A -de, dhebo 'ü- yö bhë 'ö tɔɔ pödhe =va 'ö -gɔ -dhe kë -na -gludë -nu -ta 'kpongtaa.»

18

Babilɔnë 'gü =siö' -kɔ

¹ =Dhe 'ö =ya kë 'pö, 'a -Zlan -bha bɔmɛ do 'bhaa 'ö -kɔ -mɔ 'wuën- -sü =va 'dho -a -gɔ 'a- yö kö -yö 'go -na dhang- 'gü kö -a 'bhü =ya sa 'kpongtaadhe 'saadhö -bha. ² 'Yö -gbla -wo 'gbee- 'ka =nɛɛ: «Babilɔnë -pö =va bhë -a 'gü =ya =siö'-! -Ka -dhe -ga, -a 'gü =ya =siö'-! -A -yadhe =ya kë zlöö -zuu yaa -nu këdhe 'ka. =Ya kë zlöö -ma =suu'-

yaazē -nu 'ö 'waa 'slöösLö -an 'saadhö -an kēdhε 'ka. ³ Bhii 'ö tɔɔ 'sεgümε -nu 'saadhö =wa -drɔɔn 'ö- -bha =sɔɔn 'gblüünzē kē -sü 'ka bhē -a mü; 'ö 'kpongtaa -gludē -nu =wa wo -de =nēng -a -bha, -kē -dhuuzē -sü 'ka, -a 'piö. 'Ö 'dhɔɔdɔmε -nu 'wo 'kpongtaa =wa kē -bhɔɔzē, -a -bha pē =sɔnnɔg' =vavazē -nu 'gü.»

⁴ 'Go mü 'zü, 'ö -wo do 'bhaa -yö go dhang- 'gü 'a- ma, 'yö- pö: «-Ka 'go pödhε bhē -a 'gü, ma 'sεgümε -nu! -Yö kē 'dhö kö =kun 'ka dho -da -a -bha =sɔɔn yaa -nu 'gü 'iin kö =kun 'ö 'klobhdhe -nu 'ö dho -ma -a 'ka bhē 'ö dho nu ka -ta 'pö. ⁵ Bhii -a -bha =sɔɔn yaa -nu -lo 'ko -ta -sü -ta =ya 'dho =ya -lo dhang- 'gü; -Zlan -zlö yaa trö -a këyuö yaa -nu 'ka. ⁶ -Kaa 'yēnng bhɔ =nε -kɔ 'ö ka 'yēnng bhɔa bhē -a 'dhö. Pē 'ö -kē kaa bhē, -kaa 'pē bho -a -gɔ -gwaa =plεzē. -Kaa -bha yɔ -kɔɔ pa -yö kē 'gbee- -gwaa =plεzē -yö ziēē -a mε 'ö- -yuö -kē ka -dhē bhē -a -ta! ⁷ -Ka 'klobhdhe waa- 'yēnngbhɔdhe wɔ -a -ta =nε -kɔ do 'ö- =kaa' 'tɔbhɔdhe waa- =naɔpē -nu 'gü bhē -a 'dhö. -Ya -pö ö -de 'gü =nεε: <A -ya zö =nε -gludhe 'dhö. 'Maa =gεandhe 'ka, 'ö n 'ka 'dho pē 'wo- -dhε ga -a dɔ 'gbεεdhö.> ⁸ -A -wun 'gü 'wun -nu 'wo 'dhoē- nu -a -ta bhē -wo -dho -ya -a -bha -dhεkpaɔyi do 'kpaan 'ka; 'ö tɔɔ ga 'dhö, ga -gbo -nu waa- din -nu. -A 'gü -dho =siö'- 'siö =kwaa'. Bhii kwa Dēmε -Zlan 'yö- -bha za kan bhē -a 'pii -yö 'gbee-.

⁹ -Gludē -nu 'wo 'kpongtaa 'ö wo -nu 'wo =sɔɔn -kē 'iin 'ö 'wo wo -de nu =naɔpē -nu -bha -kē mε -gɔ -sü -dhē bhē, yi 'wo 'dhoē- pödhε bhē -a 'güö -sü 'siɔn =luu'- -sü yöē bhē -a 'ka, -wo -dho 'gbo bɔ wo -de =maa 'ma -sü 'ka -a -wun 'gü. ¹⁰ -Wo -dho dɔ -a 'ka =gbiin 'suö 'ka, 'yēnngbhɔdhe 'ö 'dhoē- nu pödhε bhē -a 'gü -mε -nu -ta bhē -a -wun 'gü, 'ö 'wo- pö: <-Mē 'yena -wun =nε -oo! 'Yena -wun -mlē 'ö =nεε! O, Babilɔnē, pödhε =va 'piigbeezē! 'Lεε do 'kpaan 'gü -wun 'yö ü 'klo bhɔ =nε =a!>

¹¹ 'Dhooɔɔɔmɛ -nu 'wo 'kpongtaa -wo 'gbo bɔ -na wo -de =maa 'ma -sü 'ka -a -wun 'gü 'pö, bhii 'ö tɔɔ mɛ 'yaa pë gbɛ 'dhɔ -an -gɔ gbɔ. ¹² Pë -nu =ya kē 'wo- dhɔ bhē 'wo tɔɔ: 'Sënnɔ, 'wëü-, -güö =suu'- -wungbeezë -nu, -zlɔɔ -nu, sɔ -sɛɛbɔ -nu, sɔ =suu'- bun nuɛazë -nu, 'lü =suu'- -wungbeezë -nu, pë -nu 'wo- yan biö 'sɔn 'ka, -a mɛ -nu 'wo 'yan -sü 'ka 'lü =suu'- do 'bhaa =sɔnnɔ' 'gbeezë 'ka, -a mɛ -nu 'wo- yan zën 'ka, -a mɛ -nu 'wo- yan -piö 'ka 'iin -tɔn 'piö -guö =suu'- do 'wo- dhɛ 'maablë, ¹³ pë din -kë -së -pë -nu 'wo- dhɛ kanɛlö waa- -a 'bhaa -nu; pë 'yi 'tëë -sëëzë -nu 'wo- dhɛ 'miilö waa- -a 'bhaa -nu, 'güö -pë 'tëë -sëëzë -nu, -drɔɔn 'yi -nu, 'yɔn -nu, 'blee- ga waa- 'blee- -bi -nu, -du -nu, 'bhla -nu, =soo -nu waa- -yaa 'gü -pë, -wo -dho -dewo 'wo mɛ 'bhee- -nu 'dhɔɔ dɔ =nɛ =nua -nu 'dhö. ¹⁴ 'Ö 'dhooɔɔɔmɛ -nu 'wo bhë 'wo- pö pödhe bhë -a -dhë: <Ü -bha =naɔpë 'ü- 'piö -be kö 'ü ü 'yan dɔ -a -bha bhë -an 'plɛ 'gü =ya =siö'-; ü -bha =bhɔɔpë -nu waa- ü -bha pë =sɔnnɔ' 'gbeezë -nu 'gü =ya =siö'-! Ü 'ka 'dho -an yö gbɔ 'gbɛɛdhö!> ¹⁵ 'Dhooɔɔɔmɛ -nu 'wo -kë =bhɔɔzë 'dhɔɔ dɔ -sü 'ka pödhe bhë -a 'gü, -wo -dho dɔ -a 'ka -gbiin 'ö 'yena -wun 'ö 'dhoë- kë pö- bhë -a 'gü -mɛ -nu 'ka bhë, 'ö- 'suö -yö -da -an 'gü. -Wo -dho 'gbo -nu bɔ wo -de =maa 'ma -sü 'ka ¹⁶ -a pö -sü 'ka =nɛɛ: <'Öö, -më 'yena -wun 'ö =nɛ -oo; 'yena -wun -mlë 'ö -kë pödhe =va =nɛ -a 'ka =nɛ -oo! 'Ö 'dhu 'ö- wo sɔ 'biɔnbiɔn 'puu waa- -a nuɛazë 'ka, 'ö 'sënnɔ =baa' -pë -nu, -guö 'yanbhɔsüzë -nu, -zlɔɔ -nu -wo -kë -a -bha, ¹⁷ 'Ö 'lɛlɛ do 'kpaan 'gü, 'ö =bhɔɔpë -nu 'wo- -gɔ 'saadhö bhë, 'ö- 'plɛ 'gü =ya =siö =nɛ =al>

'Dhiö -sü 'yitagɔ 'dhasi -nu 'ka -mɛ waa- ö bha -dho 'tagüme -nu, 'yitagɔblüme -nu waa- 'yitagɔgüme -nu 'wo to 'töüdhö -wo -dɔ =gbiin, ¹⁸ 'wo 'kɔ -nu 'güö -sü 'siɔn -ga; 'wo yö =gblaa 'gbla -sü 'gü =nɛɛ: <Pödhe 'ö- =suu'- dho kë =nɛ pödhe =va 'ö =nɛ -a 'dhö yaa kē -dhö do!> ¹⁹ 'Wo -büö

-bi -nu -lo wo -gɔ -ta, 'wo 'gbo -nu bɔ wo -de -maa 'ma -sü 'ka =woë' =nɛɛ: <'Yena -wun -mü =dhɛ =ɛ! Pödhe =va 'ö =nɛ 'ö- -bha =bhɔɔpë -nu bhë 'ö mɛ -nu 'wo 'yoo -ta 'yitagɔgümɛ -nu 'ka 'wo =kaa' =bhɔɔzë bhë 'yena -wun =ya kaa =dhɛ =ɛ! Bhii 'lɛɛ do 'kpaan 'gü -wun =yaa- 'plɛ 'gü =siö'-! ²⁰ Dhang- 'gü -dhɛ, -bhö =zuögludhi kë, bhii -a 'gü =ya =siö'-; mɛ -nu 'ö -Zlan -yö ka sü ö -bha 'ka, ka 'dhö, -Zlan 'dhiwopömɛ -nu 'dhö, waa- Yesu -bha bɔ -mɛ -nu, -ka =zuögludhi kë, bhii -Zlan =ya -a -bha za 'kan, -a -bha 'wun yaa 'ö- -kë ka 'ka bhë -a -wun 'gü. Za =yaa- 'kun, -a 'klo =ya bhɔ. >>

²¹ =Dhe =ya kë 'dhö, 'ö -Zlan -bha bɔmɛ do 'gü 'gbeeze -yö -guö kpö do 'ö- -ta -yö -kë =nɛ 'blee- ga -wüü -a 'ka -guö kpö do =va 'dhö -a sü 'ö- -zuö 'yoo =bhaa -a pö -sü 'ka =nɛɛ: «-Kɔ do gia- 'ö =nɛ 'ö Babilɔnë -pö =va dho =zong'- -a 'ka kö -a 'gü -yaan =siö'-. 'Ö mɛ gbɛ 'ka 'dho ö 'yan dɔ -a -bha gbɔ 'gbɛɛdhö. ²² Mɛ gbɛ 'ka 'dho 'tan bho -wo -nu, kɔng zë -wo -nu, -bhɔng -piö -wo -nu waa- 'truu -piö -wo -nu -an gbɛ ma ü =plöö gbɔ. Waa 'dho =daan' -yuö =suu'- 'oo =suu'- kë -mɛ gbɛ yö ü =plöö gbɔ. Waa 'dho 'blee- ga zɔn -drinng ma ü =plöö gbɔ. ²³ =Labang yaa 'dho yö ü =plöö gbɔ. Waa 'dho dhe 'sü -sü 'iin -dho gwaan -sü -drinng ma ü =plöö gbɔ. Ü -bha 'dhɔɔdɔmɛ -nu -wo -kë mɛ 'piigbeeze -nu 'ka 'kpongtaa, bhii ü 'sɛgümɛ -nu 'plɛ -püö ü -bha 'gina -nu kë -sü 'ka.

²⁴ Babilɔnë -dhɛ 'klo -yö -bhɔ, 'ö tɔɔ -dhɛ bhë =nɛ 'ö 'wo -Zlan -wodhiölomɛ -nu waa- mɛ 'slööslö -nu zë -a -bha. Mɛ -nu 'saadhö 'wo -an zë 'kpongtaa, -wo -an -yö mü.»

19

¹ =Dhe =ya kë 'dhö, 'ö pë 'ö -kë =nɛ mɛ gbung =va 'we -wo 'dhö 'a- -ma dhang- 'gü, 'ö- pö =nɛɛ: «-Kwa =toëpö -Zlan 'tɔ bhɔ! Dhasü, 'tɔbhɔdhe waa- 'piigbeedhe -wo

kwa -bha -Zlan -bha 'ka! ²Bhii -a -bha za 'kan -ko -yö 'wun gia- 'ka 'ö 'yö kpengdhö! 'Ö tɔɔ =ya -lo =sɔɔnkédhe =va bhë -a tuö. Za =yaa- 'kun, yö 'ö 'kpongtaame 'plɛ -gɔ 'gü =siö ö -bha =sɔɔn kë -sü 'ka bhë, -Zlan =ya 'klobhɔdhe -da -a -ta. -A 'klo -bhɔ -gɛn 'bhaa 'ö tɔɔ -Zlan -bha yuökëme -nu zë 'ö- wo bhë.» ³'Ö 'we -wo 'ö -kë =nɛ mɛ gbung -wo 'dhö bhë 'ö -we 'zü =nɛɛ: «-Kwa =toëpö -Zlan 'tɔ bhɔ, bhii pödhɛ =va bhë -a 'güö -sü 'siɔn -yö -dho =luu' =toëpö 'ka!» ⁴'Ö mɛ ziiiii -nu 'gɔɔ- =plɛ ö ga -yiisië waa- pë 'bhee- -nu -yiisië 'wo bhë 'wo -lo wo kpɔn 'gü -Zlan 'ö -ya -sü 'ka 'gɔ -gbloo 'gü bhë -a 'dhiö 'ö 'wo- gba =woë' =nɛɛ: «Amɛn! =Dhɛ -kë 'dhö kö -kwa -Zlan 'tɔ kë =va!»

'Bhlanë -bha dhe 'sü 'wlaan-

⁵'Yö -wo do -yö go 'gɔ -gbloo 'gü =zian' 'yö- pö: «-Ka kwa Dë -Zlan 'tɔ bhɔ, ka 'saadhö 'ö 'ka- -bha yuökëme 'ka waa- mɛ -nu 'ka -suö -a -dhë, ka mɛ =va 'ka 'iin ka 'në 'tee 'ka!» ⁶'Go mü 'ö 'we -wo do 'ö bhɔ mɛ gbung =va 'we -wo -bha =nɛ 'yiga =va -nu -zuö -drinng 'dhö, 'iin 'gbee- 'ka =nɛ dha 'we -wo 'dhö 'a- ma =nɛɛ: «Kwa -bha =toëpö -Zlan 'tɔ -yö kë =va! Bhii kwa Dëme 'ö kwa -bha -Zlan 'piigbeezë 'ka bhë -a 'tɔ -yö mɛ =kɔɔn -na -gludédhe 'gü! ⁷-Kwa =zuögludhi kë 'sönggö -sönggö, 'kwa- 'tɔ kë =va. Bhii 'bhlanë -bha dhe 'sü 'wlaan- yi =ya -lo. -A -bha dhebɔ =ya ö -de =baa!-. ⁸-Wogbiindhe -yö -nu -a -dhë, kö -yö ö 'dhu sɔ 'piɔnpiɔn, 'bhü -sü 'go mü 'ö 'puu -a 'ka. Sɔ 'piɔnpiɔn bhë -ya -zɔn këwun -nu kpengdhö 'ö -Zlan -bha 'sɛgɔgümɛ -nu 'dho -a kë -na bhë -a 'ka.» ⁹=Dhɛ =ya kë 'pö, 'ö -Zlan -bha bɔmɛ -ya pö n -dhë: «-Bhö 'sëédhe 'sü, 'ü pë -ya =woë' =nɛɛ: =Zuögludhi -yö mɛ -nu 'wo -an =dhɔɔ -kë 'bhlanë -bha dhe 'sü 'wlaan- -ta bhë -an -gɔ.» 'Ö ko 'zü 'ö- pö =nɛɛ: «-Wo bhë, -Zlan -wo giagia 'ö go -a 'dhii yö -mü.» ¹⁰'Yö 'a -lo n kpɔn 'gü -a =gɛɛndhö kö 'aan- gba, 'yö- pö n -dhë: «Dɔ! Kö =kun 'ü- -kë 'dhö! Yuökëme

-mü n 'ka 'pö =nE ü 'dhö, ü dheglu 'në gɔɔn- -nu 'ö pë -nu 'ö Yesu -ya -kë bhë 'ö -kë -an 'yaan 'ö 'wo- -wun =blEɛ'- -mE 'ka bhë ka 'dhö. -Bhö -Zlan gba =zian'!» Bhii pë 'ö -kë -bin -sü 'ka 'ö Yesu -ya yö -dhegbeadhE 'gü bhë 'ö tɔɔ -Zuu 'slööslö 'ö 'wun -nu dɔ -na mE -nu 'dhii 'ö 'wo -Zlan 'dhi -wo pö -na -a 'ka bhë.

-Ya =soo 'puu =taa -mE -bha -to -a 'gbee- 'ka -sü

¹¹ =DhE =ya kë 'dhö, a dhang- -yö kö -a 'dhi =ya 'po, 'ö =soo 'puu do -yö -wo. ME 'ö -kë -ya -sü 'ka -a =taa bhë -a 'tɔ tɔɔ «-TowotamE»; 'ö- 'bhaa -yö -kë 'zü «'Wungiagia» 'ka; =ya za 'kan, -ya -kan -a 'kan -kɔ 'ka kpengdhö; 'iin =ya 'ko zë mE 'ka, kö -ya -zë 'wun gia- -wun 'gü. ¹² -A 'yan -yö -kë 'bhü -dhiadhö =nE 'siö 'dhö. 'ö 'gɔ =gblaa' =plëëzë 'dhoë- -gɔ -bha. 'Tɔ do 'ö mE gbE 'yaa- dɔ -a 'ke yaa kë yö gia- -a 'ka -yö -kë -ya -sü 'ka -a -bha. ¹³ Gblang 'ö fei -ya kun 'töüdhö bhë, (yö =nE 'ö- -zɔn zö =nE -ya =soo =taa -mE 'ö bhë =ya 'toë- 'gbee- 'ka ö yaagümE -nu -ta) -yö -kë -a -bha. ME bhë -a 'tɔ tɔɔ -Zlan -wo. ¹⁴ -Glu gbung 'wo dhang- 'gü -wo -kë -a 'piö; sɔ 'piɔnpiɔn 'puu 'slööslö -yö -kë -an -bha 'ö 'wo -kë -ya -sü 'ka =soo 'puu -nu =taa. ¹⁵ 'Ö -dhaa 'dhiözë do 'yö dho 'segümE -nu 'klo bhɔ -a 'ka 'yö go -a 'dhii. -Yö -dho 'dhiö sü -an 'ka -piö 'gblɔɔngblɔn do 'ka; 'yö dho lEzEɛn -kpa -nu =wüü'- lEzEɛn -kpa 'yi -bho -a 'gü -pë 'ö -Zlan 'piigbeezë -bha -naazuëdhe 'gblüünzë bhë -a 'gü -pë 'ka bhë -a 'gü. ¹⁶ Pë do 'ö -kë -a 'tɔ 'ka -yö -kë -ya -sü 'ka -a -bha gblang waa- -a -gEɛn -an -bha =nEɛ: «-Gludë -nu -bha -Gludë waa- dëmE -nu -bha DëmE».

¹⁷ 'Go mü 'zü 'a -Zlan -bha bɔmE do 'bhaa yö kö -yö -dɔ -sü 'ka lan- 'gü. 'Yö -gbla -wo do 'gbee- 'ka -ma -nu 'wo -kë ziö =dhia -an -dhë =nEɛ: «-Ka nu 'ka 'dho ka 'kuëdhö -Zlan -bha -bhöpë =va 'ö =nE -a -ta! ¹⁸ -Ka nu, 'ka -gludë -nu, 'dhasi -nu -gɔmE -nu, 'gü 'gbee- -mE -nu, =soo -nu waa- ö -ya -a =taa -mE -nu, mE -nu 'töüdhö 'wo 'gan 'gü

'iin 'waa 'gan 'gü -nu, mε =vava -nu 'iin 'në 'sεεn- -nu -an -bhö!»

¹⁹ 'Go mü 'a wü 'dhö, 'kpongtaa -gludë -nu waa- wo -bha -glu gbung -nu yö kö =wa 'dho wo 'ko =bhaa -waan -glu -ya mε 'ö =soo =taa bhë waa- ö -bha -glu gbung -nu -an -bha. ²⁰ 'Kεε mε 'ö -kë =soo =taa bhë waa- ö -bha mε -nu -wo -to -a 'gbee- 'ka -an -ta 'ö wü 'ö bhë 'wo- kun 'gan 'ka. Yö 'dhö waa- -Zlan -wodhiölomε =suazë 'yö -dhidhaapë -nu -kë wü bhë -a 'yan 'dhiö bhë 'wo -an kun. -Dhidhaapë -nu bhë =nε 'ö bɔ -a -ta 'ö mε -nu -püö; 'ö 'wo wü bhë -a -bha =duakëpë -ya -an -bha; 'ö wü bhë 'ö mε -nu -wa 'bin gba. Wü bhë waa- -Zlan -wodhiölomε =suazë bhë -wo -to 'bhee- 'ka 'wo -an -zuö 'siö kpö -ta -dhε 'ö blɔɔn 'tëë yaazë 'dho 'güö -na -a -bha bhë -a 'gü. ²¹ 'Kεε mε -nu 'wo to -wo -ga -dhaa 'ö 'go -na mε 'ö -ya =soo =taa bhë -a dhiö bhë -a =kwaa'; 'ö -ma -nu 'saadhö -wo -an =glöö -kë wo -bha -bhöpë 'ka.

20

¹ 'Go mü 'zü a -Zlan -bha bɔmε do -yö kö -yö 'go -na dhang- 'gü -yö =yɔɔ' -na; -glu 'kpa 'dhi =va bhë, -a -yö -a 'dhiö -pë =lakele waa- =yɔɔ' -bhüö =va do -wo -kë -a kwεε.

² 'Yö nu 'yö 'gina 'ö =mεε zii 'ka bhë, 'ö- kun. 'Gina bhë =nε 'ö tɔɔ dü 'wo- -dhε Satan. 'Yö- -lö =yɔɔ' 'ka -kwε -vuu do 'piö. ³ 'Ö -Zlan -bha bɔmε -ya -zuö -glu 'kpa 'dhi =va 'gü, 'yö- 'dhi ta, 'ö ö -bha -wogbiindhε =duakëpë to -a -bha, -yö kë 'dhö kö =kun 'ö dho 'sεgümε -nu bho zian -ta gbɔ -yö 'dho -yö yöë -kwε -vuu do bhë -a -lo -yi -bha. -Kwε -vuu do bhë =ya -lo, -wo -dho wo =kwaa'- -a -zü 'töng pë 'tee -bha.

⁴ 'Go mü 'a 'gɔ -gbloo -nu yö: mε -nu 'wo -kë -ya -sü 'ka -a 'gü bhë -wo -kɔ -mɔ 'wuën- -sü yö kö -waan mε -nu -bha za 'kan. mε -nu 'wo to -piö =kwaa' Yesu -wun =blεε' -sü waa- -Zlan -wo -an -wun 'gü, 'ö wü 'ö bhë waa- -a 'bin

'ö waa -an gba, 'ö waa =duakëpë gbɛ -ya -an -kpong 'gü 'iin -an -kɔ -nu -bha bhë, a -an nii -yö mü 'pö, 'ö -kë -a 'gü -sü -yö nu -an -dhë, 'ö waa- Klito -nu 'ö 'wo -gludëdhɛ -kë -kwɛ -vuu do bhë -a 'piö. ⁵-Go ga 'gü -sü -blɛɛzë =nɛ bhë. Gamɛ -nu mɛ 'wo to waa 'dho go ga 'gü 'ö dho 'ö yöë -kwɛ -vuu do bhë -a ziö -sü -bha. ⁶=Zuögludhi waa- 'dhoë- -yö 'to mɛ -nu 'wo 'dhoë- go ga 'gü -blɛɛzë 'ka bhë -an -ta! Ga kë =plɛ -naa -kɔ 'ka 'dho -mɔ -an -bha gbɔ 'gbɛɛdhö. -Wo -dho kë -Zlan waa- Klito -an -bha slabhomɛ -nu 'ka. -Wo -dho -gludëdhɛ kë Klito 'piö -kwɛ -vuu do bhë -a -bha.

-To -a 'gbee- 'ka Satan -ta -sü

⁷-Kwɛ -vuu do 'ö bhë =ya ziö, Satan -yö -dho go -kanso 'gü. ⁸-Yö -dho dho 'ö 'sɛgɔgümɛ -nu 'wo -lo -sü 'ka 'sɛ -to 'dhö -sü -ta, 'yö -an -püö; 'wo tɔɔ Gɔgö waa- Magɔgö. -Yö -dho -an -dhɛ 'ko =bhaa kö -waan -glu gɔn; -an -dho 'kuë- -sü -wo -dho kë =va =nɛ 'yënnɔ -nu 'dhö 'yoo 'kpong 'dhiö. ⁹-Wo =yɔɔn -na 'sɛ 'pian 'saadhö -ta; -wo =nië' -na -Zlan -bha mɛ -nu waa- -a -bha pödhɛ 'ö- -dhɔ -ya -kë bhë -an -zü. 'Kɛɛ 'siö -yö -dho go dhang- 'gü, 'yö -an 'gü -siö. ¹⁰Dü 'yö -kë -an -püö =dhia -be bhë, -yö -dho -zuö 'siö 'yipüë waa- blɔɔn 'tëë yaazë -an 'gü; -dhɛ bhë =nɛ 'ö wü waa- -Zlan -wodhiölomɛ =suazë bhë 'ö =wa -an -zuö -a -bha 'dhiö 'saadhö. -An 'klo -dho bhɔ lënnɔ waa- gbeng -nu 'plɛ 'ka =toëpö 'ka.

Za -kaanta dɔ -sü

¹¹'Go mü 'ö 'gɔ -gbloo 'puu =va waa- mɛ 'ö -kë -ya -sü 'ka -a 'gü bhë 'a -an yö. 'Sɛ waa- dhang- -wo -ziö 'wo go -a 'dhiö, 'ö mɛ gbɛ yaa -an yö gbɔ. ¹²=Dhɛ =ya kë 'pö, 'a gamɛ -nu, mɛ =vava -nu, mɛ 'sɛɛn- -nu -an yö kö -wo dɔ -sü 'ka 'gɔ -gbloo 'dhiö. 'Ö mɛ do -yö 'sëëdhɛ -be -nu 'dhi -po. 'Sëëdhɛ -be do 'bhaa -yö -kë mü 'ö 'wo- 'dhi po 'pö. Yö =nɛ 'ö tɔɔ -kë -a 'gü -sü 'sëëdhɛ -be. 'Ö gamɛ -nu -bha

za -yö -kan pë -nu 'wo- -kë, 'ö -ya -sü 'ka 'sëédhε -be -nu bhë -an 'gü bhë -a -wun 'gü. ¹³'Ö 'yoo -yö nu ö -bha mε -nu 'wo to -a -bhaa -an 'ka za dɔ -dhε -bhaa mü. 'Ö ga waa- =glööbɔɔdhε 'wo nu wo -bha gamε -nu 'ka mü 'pö. 'Ö -an -bha za -yö -kan pë -nu 'wo- kë -a -wun 'gü. ¹⁴=Dhε 'ö -an -bha za =ya 'kan, 'wo ga -de gia- waa- =glööbɔɔdhε -an -zuö 'siö 'yipuë 'gü. 'Siö 'yipuë 'gü -dhε bhë 'ö tɔɔ ga -kë =plε -naa. ¹⁵Mε 'oo mε 'ö- 'tɔ yaa kë -ya -sü 'ka -kë -a 'gü -sü 'sëédhε -be bhë -a 'gü, -a -zuö 'wo- wo 'siö 'yipuë bhë -a 'gü.

21

Dhang- -dëü waa- 'sε -dëü

¹'Go mü 'a dhang- 'gü -dhε -dëü waa- 'sε -dëü -an yö; kö dhang- zii waa- 'sε zii 'waa -dhö gbɔ, kö 'yoo gbε 'yaa -dhö gbɔ. ²'Ö pödhe 'slööslö 'ö Zeluzalemë -dhε -dëü 'ka bhë, 'a- yö kö -yö 'go -na -Zlan 'piö dhang- 'gü -yö =yɔɔ' -na kö =ya kë =nε pë 'wo- pö dhebɔ 'ö =ya ö 'dhu =nε -dhε 'wo pö -a -bha, -a -bha -dho gwaan -yi -mü =dεε -a 'dhö -a 'dhö. ³A 'we -wo do 'ö -kë 'gbee- 'ö go 'gɔ -gbloo 'gü =zian' 'a- ma 'yö- pö: «Dɔ 'kwa- wo zlöö =nε bhë, -Zlan -dho kë mε 'bhee- -nu 'piö, =ya nu mε 'bhee- -nu ziën. -Zlan -yö -dho kë -an 'piö, 'wo -kë -a -bha 'sεgɔgümε -nu 'ka, 'ö yö gia- 'ö -kë -an -bha -Zlan 'ka. ⁴-Yö -dho -an 'yënnε =dhuë!-. 'Ö ga -sü -nu, -wokpɔdhe -nu 'iin 'yënnεbhɔdhe -nu -an gbε yaa 'dho kë -dhö gbɔ, bhii pë ziizii -nu 'wo bhë =wa ziö.»

⁵'Ö mε 'ö -kë -ya -sü 'ka 'gɔ -gbloo 'gü bhë, 'ö- pö: «Dɔ 'kwa- wo zlöö =nε bhë, 'ma pë 'plε kë -dëü.» 'Go mü 'yö- pö n -dhë: «'Wun mε 'ö bhë -a -ya; bhii n -wo -nu 'wo bhë -wo 'wun gia- 'ka, 'ö -zo -yö -an -bha -sü -yö -an -ma kun.» ⁶'Yö- pö 'zü: «=Ya yën, ma =nε 'a tɔɔ Alüfa waa- Omεga; 'a pë -blεzë waa- pë 'dhiötodhε -an 'ka. Mε 'ö 'yi mü -dhɔ

=yaa- 'kun, a -dho -a gbaa -kë -a 'gü -yi 'ka 'kpaan. ⁷ Mε -nu 'wo 'dhoë- to -a 'gbee- 'ka, pë -nu 'wo dho kë gbaɔ 'ka 'aan- kë -an -dhë 'wo bhë, 'go mü a -dho kë -an -bha -Zlan 'ka -waan kë n gbö -nu 'ka. ⁸ =Ya 'to mε -nu 'ö -an -gɔ -ga 'yaa -an 'dhiö -nu, mε 'waa -Zlan -wo =bhlë -ya, mε =lɔɔzë -nu, mεzëmε -nu, =sɔɔnkëmε -nu, mε -nu 'wo wo -zo 'to -na bhë këpë -nu 'piö -nu, mε -nu 'wo gbapë -nu gba -na waa- =suamε -nu 'töüdhö, -an -bha këdhε -yö -dho kë 'yi 'siö- 'puëë 'ö 'siö 'gü -dhε waa- blɔɔn 'tëë yaa 'gü -dhε 'ö ga kë =plε -naa 'ka bhë -a 'gü.»

Zeluzalemë -dhε -dëü

⁹ -Zlan -bha bɔmε -nu 'slaple 'ö -Zlan -bha -wɔ mε -ta -wun -kɔɔ 'slaple 'dho -an kwεε bhë, -a mε do -yö -nu 'yö- pö n -dhë: «-Bhö nu 'a 'bhlanë -bha 'sü dhe -zɔn ü -dhë!» ¹⁰ 'Ö -Zlan -bha bɔmε -yö dho n 'ka -tɔn do =gbiin tuö -Zuu 'slööslö =kwaa'. 'Yö Zeluzalemë -pö 'slööslö 'yö -kë go =dhia dhang- 'gü -Zlan 'piö bhë 'yö- -zɔn n -dhë. ¹¹ -Yö -kë 'bhü =dhia -Zlan -bha 'tɔbhɔdhe 'ka. Pödhe bhë -a 'bhü -kɔ -yö -kë =nε -guö 'yanbhɔsüzë =sɔnng' 'gbeezë =suu'- do 'wo- -dhε 'zasüpë 'kεε 'ö- bun 'dhö 'bhlöngbhlöng -a 'dhö. ¹² 'Ö pë 'ö -kë =nε böü- 'kplong =va =gbiin 'dhö 'ö =nië -a -zü. 'Ö- 'dhi -nu 'dho 'gɔɔ- do ö ga =plε, 'ö -Zlan -bha bɔmε 'gɔɔ- do ö ga =plε -wo wo -zo -kë 'kɔdhi -nu 'wo bhë -an 'piö. 'Ö- 'dhiö kpong -nu 'gɔɔ- do ga =plε 'wo bhë 'ö Izlaelö 'gunng -gɔ 'gɔɔ- do ga =plε 'tɔ 'dho -ya -sü 'ka -an -bha 'dhö do do 'ka. ¹³ 'Kɔdhi -yaaga 'ö- 'pian 'ö -dhö ö -a -ta. -A -yaaga -wo lan- 'go =zian'; -a -yaaga -wo kwa 'pian do -gɔ dhuö =zian', -a -yaaga -wo kwa 'pian do -gɔ goo =zian'; 'ö- -yaaga 'dho lan- -püö =zian'. ¹⁴ Pödhe 'kplong bhë, -wa -gban -guö kpö 'gɔɔ- do ga =plε -ta. 'Ö -guö 'gɔɔ- do ga =plε 'wo bhë 'ö 'bhlanë -bha bɔmε -nu 'gɔɔ- do ga =plε 'tɔ 'dho -ya -sü 'ka -an -ta.

¹⁵ -Zlan -bha bɔmɛ 'ö -kë 'wun -blɛɛ n -dhë =dhia bhë, 'sënnɔ 'lü 'në 'yö -kë pëdanpë 'ka -yö -kë -a kwɛɛ, kö -yaan pödhe bhë 'dhö, ö 'kɔdhi -nu waa- ö 'kplong -nu daan.

¹⁶ Pödhe bhë -a 'pian -yiisië 'wo bhë, -wo -mɔ wo 'kuë 'kpodhö. =Dhe 'ö -Zlan -bha bɔmɛ -ya do dan ö -bha 'lü 'në bhë -a 'ka, -a 'kilong -yö -kë -vuu =plɛ ö -ta =plɛ. Pë do bhë 'ö- 'ka pödhe bhë -a -bha 'kɔ -nu 'pian 'plɛ 'piö.

¹⁷ 'Yö -Zlan -bha bɔmɛ -yö 'kplong bhë -a -ta dan. 'Ö -ta =duan' -yö -kë 'mɛtrë 'gɔɔ- 'slapɛ ga =plɛ. ¹⁸ 'Kplong 'ö bhë -wa -dɔ -guö =suu'- =sɔnnɔ 'gbeezë do 'wo- dhe 'zasüpë bhë -a 'ka. Pödhe gia- -de 'gü -dhe -yö -kë 'sënnɔ 'bhlöngbhlöng 'ka =nɛ 'vɛdhe 'dhö. ¹⁹ -Guö -nu 'wo -kë 'kplong bhë -a -gban -a -ta -pë 'ka bhë, -guö -sɛɛbɔ -nu -wun =suu'- 'gbeezë -nu -wo -kë dɔ -sü 'ka -a -bha. -A -gɛn =luu'- -guö -blɛɛzë -yö -kë -guö 'wo- dhe 'zasüpë ('ö -gblɛibizë) bhë -a 'ka; -a kë =plɛ -naa -yö -kë safii, ('ö -bun 'dho 'budhazë) -a 'ka. -A kë -yaaga -naa tɔɔ agatö, 'ö- 'yan 'dho =plëözë. -A kë -yiisië -naa tɔɔ emelodö. (-Yö -kë -gblɛibizë.) ²⁰ -A kë 'sɔɔdhu -naa tɔɔ onikusö 'ö- 'yan 'dho =plëözë; -a kë 'slado -naa ('ö- bun -yö kë nuɛazë) tɔɔ 'saaduanö. -A kë 'slapɛ -naa tɔɔ klizolitö 'ö- bun -yö -kë =nɛ zën 'dhö; -a 'slɛaga -naa tɔɔ belilö ('ö- 'bhaa -nu bun -yö bhɔ 'budha -bha 'iin -gblɛibi -bha). -A 'sɛisië -naa tɔɔ topazë ('ö- bun -yö -kë =nɛ 'siö 'dhö). -A 'gɔɔ- do -na tɔɔ klizoplazë ('ö- bun -yö -kë 'puu -gblɛibizë). -A 'gɔɔ- do ga do -naa tɔɔ tuukwaazë (-yö -kë 'budhazë); -a 'gɔɔ- do ga =plɛ -naa (bun -yö nuɛazë =nɛ dha -bhüö -dhe nuɛazë 'dhö) 'wo- dhe ametisö. ²¹ 'Kwɛɛ 'dhi 'gɔɔ- do ga =plɛ 'wo bhë 'wo tɔɔ -zlɔɔga -nu 'gɔɔ- do ga =plɛ. Kpong -nu 'wo 'dhö bhë -a do -yö -kë -zlɔɔga -nu 'wo bhë -a do 'ka; -kpinngga 'ö plöö mü -a -ta dhuö -dhe -yö kë 'sënnɔ 'puu 'ka; 'yö -kë 'bhlöngbhlöng =nɛ 'vɛdhe 'dhö.

²² N 'ka -Zlan -gba -a 'gü -kɔ gbɛ yö pödhe bhë -a 'gü,

bhii kwa DëmE -Zlan 'piigbeeze waa- 'bhlanë -wo -dhe bhë -a -bha. ²³Pödhe -bha -wun 'yaa lan- 'iin 'su -an -bha kö -waan 'bhü -a -ta, bhii -Zlan -bha 'töbhödhe -yö -bhü -a -ta, 'ö 'bhlanë 'dho -a -bha =labang 'ka. ²⁴'SëgümE -nu -wo -dho 'ta sü -a -bha -dhepuudhe 'gü, 'ö 'kpongtaa -gludë -nu -wo nu wo -bha =bhöppë -nu 'ka. ²⁵Pödhe 'kodhi -nu -wo -dho to 'po -sü 'ka. -An 'dhi 'ka 'dho ta, bhii 'bin 'më -sü yaa 'dho kë mü. ²⁶'Kpongtaame -nu -wo -dho nu wo -bha =bhöppë waa- =bhlëyadhe -an 'ka mü. ²⁷'KëE pë -dhuuzë gbE 'ka 'dhö -da pödhe bhë -a 'gü, 'iin mE 'ö -këpë -nu -wo -kë pë =löözë waa- =sua -wun =blëE' -sü -an 'ka, wo 'ka 'dho -da mü 'pö. ME -nu 'wo dho -da mü, 'wo töö mE -nu 'ö -an 'tö 'dho -ya -sü 'ka 'bhlanë -bha 'sëedhe -be 'ö -kë -a 'gü -sü 'sëedhe -be 'ka bhë -a 'gü.

22

¹-Kë -a 'gü 'yiga 'ö 'bhlöngbhlöng -nE pë 'wo 'vedhe kë -na -a 'ka =nE -a 'dhö bhë, -Zlan -bha bömE -ya -zön n -dhë. -Yö -kë 'go =dhia -Zlan waa- 'bhlanë -an -bha 'gö -gbloo 'gü. ²'Yiga bhë -yö -kë ziö =dhia -kpinngga 'ö pö -ziën bhë -a 'piö. -Kë -a 'gü -lü -nu -wo -kë dö -sü 'ka -a 'kpong 'dhiö mü. -An bhE -nu -wo -ya -gwaa 'gö -do ga =plëzë -kwE do 'gü. 'Su 'saadhö 'ka, -an bhE -nu -wo -kë. -A 'dhe -nu 'wo bhë =nE 'wo 'sëgümE -nu -dhe bo. ³-Zlan 'ka 'dho 'dhangga -ya pë gbE -bha gbö.

-Zlan waa- 'bhlanë -an -bha 'gö -gbloo -wo -dho kë pödhe bhë -a -bha, 'ö -Zlan -bha yuökëmE -nu 'wo dho -a gba. ⁴-Wo -dho wo 'yan dö -a -bha; 'ö -a 'tö dhö kë -ya -sü 'ka -an -kpong 'gü. ⁵'Bin -bha 'më -sü gbE 'ka 'dho kë mü, 'ö -an -bha -wun gbE 'ka 'dho kë =labang -bha -dhepuudhe -bha 'iin lan- -bha -dhepuudhe -bha, bhii 'ö töö kwa DëmE -Zlan -yö -dho ö -bha -dhepuudhe bhü -an -ta, 'ö 'wo dho -gludëdhe kë =toëpö 'ka.

Yesu -bha nu -sü

⁶ 'Go mü 'ö -Zlan -bha bome -ya pö n -dhë: «'Wun -nu 'wo bhë -wo 'wun gia- 'ka 'ö -an -dhe 'wun gia- -sü -ya -ma kun. Dëme -Zlan 'ö =ya kë 'ö ö -bha -Zuu -ya ö -wodhiölome -nu 'gü =ne -yö ö -bha bome -bo kö pë -nu 'wo nu -na bhë, -yaan -a -zön ö -bha yuökëme -nu -dhë.»

⁷ Yesu -ya -pö: «-Bhö ü 'to 'to! A nu -na; =zuögludhi -yö me 'ö -Zlan 'dhi -wo 'ö go 'sëedhe =ne -a 'gü -a -bhlë -ya bhë -a -gö.»

⁸ Ma Zan -me, -wo -nu 'wo =ne 'a -an -ma, 'ö pë -nu 'wo =ne 'a -an yö. =Dhe 'ma yën -a -bha, 'a -lo n kpön 'gü -Zlan -bha bome 'ö pë -nu 'wo =ne 'ö -zön n -dhë bhë -a =gëendhö kö 'aan- gba. ⁹ 'Yö- pö n -dhë: «Kö =kun 'ü- -kë 'dhö! A -Zlan -bha yuökëme 'ka =ne ü 'dhö, ü dheglu -nu 'wo -Zlan -wodhiölome 'ka -nu waa- me -nu 'wo -wo 'ö 'sëedhe -be 'ö =ne -a 'gü 'wo- =bhlë -ya -nu, ka 'dhö. -Bhö -Zlan gba =zian'!» ¹⁰ 'Go mü 'yö- pö n -dhë: «Kö =kun 'ö -Zlan 'dhi -wo 'ö -ya -sü 'ka 'sëedhe -be =ne -a 'gü bhë 'ü- -bin, bhii 'töng 'yö -ya pë -nu 'wo =ne -an -bha kë -yi 'ka bhë =ya yö =klöö'. ¹¹ Me 'ö- këwun 'dho ya, -yö 'wun yaa kë -yö dhoë 'dhiö; me 'ö ö -de kun ya, -yö -de -kun yaa kë -yö dhoë 'dhiö; me 'ö- këwun 'dho -së -yö 'wun -së kë, -yö dhoë 'dhiö, me 'ö 'slööslö -yö 'dho -kë 'slööslö -sü 'ka 'dhiö.»

¹² Yesu -ya -pö: «-Bhö ü 'to to! A nu -na! A -dho nu ma me -nu =saan' 'ka; 'a dho -a dan me 'ö -dhö -a këpë -nu =tian' 'a- nu -a -dhë. ¹³ Ma =ne 'a tōō Alüfa waa- Omëga; a pë ple züdothe waa- -a 'dhiötodhe -an 'ka.»

¹⁴ =Zuögludhi -yö kë me -nu 'wo wo -bha gblang -zlu, 'ö -an =dua' 'dho -mü kö -waan -da pödhe bhë -a 'kōdhi gia- -bha -waan -kë -a 'gü -sü -lü bhe 'ö bhë -a -bhö -an -gö. ¹⁵ KEE pö- =taa -bha -dhe bhë 'ö tōō me =lōōzë -nu, me -nu 'wo to 'gina kë -sü -nu 'piö -nu, =sōōnkëme -nu,

mεzēm -nu, -gbapë gbamε -nu waa- mε -nu 'wo -sua -kë wo -wo waa- wo kë -kɔ -nu 'ka -nu -an 'plε -an 'to -dhε.

¹⁶ «Ma Yesu -mε, 'a ma bɔmε -bɔ ka -dhë kö -yaan pë -nu 'wo =nε -an =blεε'- n -wun -dhε 'wun gia- -mε -nu -dho 'kuë- -sü -nu -dhë. A Davidö =suu'- -ta 'gü -mε 'ka; a 'susongga 'yö bhü -dhiadhiö -a 'ka.»

¹⁷ -Zuu 'slöösLö waa- 'sü dhe -wa -pö: «-Bhö nu!» 'Ö mε 'ö =ya -an -wo ma, -ya pö 'pö: «-Bhö nu!» Mε 'ö 'yi mü -dhɔ =yaa- 'kun -yö nu; mε 'ö -kë -a 'gü -yi 'piö -yö -dho nu -a -dhë 'kpaan.

'Wun -gɔ dɔ -dhε

¹⁸ Ma Zan -mε, a- -pö ka -dhë -yö sia- -sü 'ka mε -nu 'töüdhö 'ö -Zlan 'dhi -wo 'ö 'sëedhε -be 'ö =nε -a 'gü 'ka- ma ka -dhë =nεε: Mε 'ö 'dhoë- 'wun 'bhaa -zuö 'sëedhε -be 'ö =nε -a -ta, -Zlan -yö -dho 'klobhɔdhe 'ö- -wun 'dho -ya -sü 'ka 'sëedhε -be 'ö =nε -a 'gü bhë -a 'bhaa -da -a -bha 'klobhɔdhe -ta. ¹⁹ 'Ö mε =ya 'wun 'bhaa bho -Zlan 'dhi -wo 'ö -ya -sü 'ka 'sëedhε -be 'ö =nε -a 'gü bhë -a -ta 'pö, -Zlan -yö -dho -a -bha -kë -a 'gü -lü bhε sü, 'yö- bho pödhε 'slöösLö 'ö- -wun -yö =blεε -a -bha 'sëedhε 'ö =nε -a 'gü bhë -a 'gü.

²⁰ Mε 'ö pë -nu 'wo -ya zö =nε 'ö -gban -a -bha bhë -ya pö: «=li-, a nu -na!»

-Yö kë =nε -kɔ bhë -a 'dhö! -Bhö nu Dëmε Yesu!

²¹ Kwa Dëmε Yesu -yö 'glusë kë ka 'saadhö ka 'ka! AmEn!

'WUN SĚ -NAŌ 'SĚĚDHĚ

Dan: 'WUN SĚ -NAŌ 'SĚĚDHĚ New Testament

copyright © 1991 Wycliffe Bible Translators, Inc.

Language: Dan

Dialect: Western

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 1 Jun 2022

74f67de7-5f93-5988-92e9-b1a45247636e